

مسرحية
الفرعون الأخير

طبعة ثانية

١٤٢٧ هـ — فبراير ٢٠٠٦ م

مكتبة الشروق الدولية



٩ شارع السعادة . أبراج عثمان . روكسى - القاهرة

تليفون وفاكس: ٤٥٠١٢٢٨ - ٤٥٠١٢٢٩ - ٢٥٦٥٩٢٩

Email: < shoroukintl @ hotmail. com >

< shoroukintl @ yahoo.com >

الفرعون الأخير

مسرحية من فصلين

أ.د. وجدى زيد

مكتبة الشرق الدولية



مقدمة

الخروج من التاريخ

هذا بلاغ أقدمه عن جريمة ارتكبتها العالم ضد مصر والمصريين عن عمد وبشكل منظم على مدى آلاف السنين، جريمة شارك فيها كل من غزا مصر واستعمرها، أنا لا أتحدث عن آثار مصر المنهوبة التي تزهو وتزين بها متاحف لندن وباريس ونيويورك وغيرها من متاحف العالم، ولا أتحدث عن مصادر مصر وخيراتها التي اغتصبها المستعمرون، وإنما أتحدث عن جريمة أكثر بشاعة وقسوة: لقد سرق الغزاة المستعمرون العقل المصرى وإنجازاته عبر عصور طويلة وأجبروا مصر والمصريين على الخروج من التاريخ فى النهاية، ودفعوا فيها الإنسان المصرى إلى نفق طويل مظلم أجبر فيه العقل المصرى على أن ينسى أنه كان ليس فقط معلم الإنسانية، بل إنه صاحب الحضارة الوحيدة التى دفعت الخيال والطموح الإنسانى إلى قمم لم تعرفها حضارة أخرى.

يقول ت. إس. إليوت إن الحضارة الغربية تبدأ بالإغريق، والمعنى هنا واضح: كل عباقرة الفكر الإغريق - هوميروس وأفلاطون وأسكيوس وسوفوكليس وغيرهم - ينتمون إلى الغرب، إليوت بهذا يستبعد أساتذة هؤلاء العباقرة، إنهم المصريون الذين علّموا الإغريق كل شيء وكانوا حقاً أطول قامة من هؤلاء العمالقة، يقول التاريخ إنه قبل ظهور مكتبتى إسكندرية وأثينا، استطاعت مصر وحضارتها أن تصل بكل قنوات الفكر الإنسانى إلى أقصى درجات التطور، وأن تصل بالعلوم والفنون إلى قمة التخصص والازدهار التى نضجت واكتملت فيها فنون الشعر والنثر وغيرها من الفروع، وعندما جاء الإغريق إلى مصر بعد عام ٣٣٢ قبل الميلاد اغتصبوا - مثل كل غاز مستعمر - ليس فقط الأرض ولكن أيضاً كل ثروات وإنجازات عقل المهزوم، وأجبروا المصريين على أن يفقدوا ذاكرتهم كمعلمين وأساتذة؛ لأن الأستاذية والتعليم سمات سيادية تخصان المنتصر فقط. هكذا بدأ الإغريق جريمة تزيف التاريخ التى استمرت حتى وقتنا هذا، تلك كانت بداية الجريمة التى يقدم إليوت - وبطريقته الخاصة - تعريفاً لها !!!

لم يكن ما اغتصبه الإغريق من المصريين، وبنى عليه الغرب والعالم حضارته التى يفاخر بها الآن، مجرد بدايات بسيطة أو أصول فجأة، فهذا - مثلاً - الكاتب الأمريكى هارولد بلوم، أشهر من كتب وما زال يكتب فى التأثير والتأثر حتى الآن، يستعير مقولات لكاتب مصرى قديم ليكشف غموض العلاقة بين القديم والجديد فى الفن والأدب، الكاتب المصرى هو خاخيبيريسينب، الذى يجب أن نحفظ اسمه ونباهى به مثلما نباهى

ونتشدق بأسماء نقاد الغرب ، يقول خاخبيير يسينب :

«يا ليت عندى عبارات لا يعرفها أحد ، غريبة ، فى لغة جديدة لم يقلها أحد ولم تستهلك ، لكنها عبارات قالها الأقدمون!» .

أليس هذا بالضبط ما قاله إليوت نفسه فى مقاله الشهير «الثرات والموهبة» عندما أراد وصف الماضى والحاضر فى العلاقة بين القديم والجديد؟! بل إننى يمكن أن أضيف فى اطمئنان أن عبارة خاخبيير يسينب أجمل وأدق من مقالة إليوت كلها! .

على أن هذه العبارة التى قالها الكاتب المصرى القديم منذ أكثر من ألفى عام قبل الميلاد تؤكد على حقيقة هامة ، ففيها يتحدث خاخبيير يسينب عن «الأقدمين» مما يعنى أنه جاء بعد سنين طويلة سبقت من الإبداع ، والمعروف علميا الآن أن قضية التأثير والتأثر فى الأدب الإنجليزى لم تأخذ كل هذا الاهتمام النقدى إلا فى النصف الثانى من القرن الماضى وبعد تراكم إبداعى عبر مئات السنين ، تزايد خاصة بعد عصر النهضة ، وصاحب هذا التراكم تزايد ما يسميه النقاد الآن «القلق» أو «هم» التأثير والتأثر عند المبدع الجديد . وعبارة الكاتب المصرى القديم تعنى أن الإبداع المصرى كان قد تراكم على مدى آلاف السنين قبل الميلاد وبعد استقرار الحضارة المصرية . ويذكر علم المكتبات مكتبة رمسيس العظيم ، وكيف أن إحدى غرف هذه المكتبة الضخمة احتوت وحدها على بضعة وعشرين ألف كتاب ، ومن الحقائق المثيرة ذات الدلالة أن أرسطو اشتهر فى زمانه كأكبر «وراق» أو «حافظ» للكتب . . . والسؤال الآن هو : من هم مؤلفو هذه الكتب التى اشتهر أرسطو بجمعها؟ المؤكد أن تلك الكتب كانت معظمها نتاج العقل المصرى ، وحصاد حضارة وإمبراطورية مصرية

شهدت قمما متعددة عبر أكثر من خمسة آلاف سنة ق. م ، واعتلت عرش العالم لمدة أربعمائة عام متواصلة انتهت بغزو الإغريق مصر بعد عام ٣٣٢ قبل الميلاد واستيلائهم على الأرض ونتاج العقل المصرى ، ونسبته إلى أنفسهم ، من هنا بدأت جريمة التزييف وإخراج مصر والمصريين من التاريخ .

الغريب أن كل القوى الاستعمارية التى جاءت بعد الإغريق إلى مصر سارت على نفس منهج «القوة تكتب التاريخ» ، مما أدى فى النهاية إلى خروج العقل المصرى من التاريخ ، ولم تعد مصر وحضارتها فى العقل الغربى سوى مومياءات وماض خرافى ، بينما أخذ الغرب لنفسه كل نتاج العقل المصرى وأعاد إنتاجه من دون الاعتراف بالمصدر .

ويمكن القول إن أمريكا التى تقود العالم الآن تواجه نفس الامتحان أو إغراء القوة التى تكتب التاريخ ، وهو إغراء لم تستطع مقاومته كل القوى التى قبلها ، لكن أمريكا - ورغم كل شىء - ما زالت تستطيع أن تفعل ما لم تفعله أية قوة قبلها وتتغلب على هذا الإغراء ، ولقد نجحت فى ذلك داخلية من خلال الحلم الأمريكى ، الذى يشترك فيه ويعيشه ويكتبه الأمريكيين دون النظر لاختلاف فى دين أو عقيدة أو جنس أو لون أو ثقافة ، المطلوب الآن «حلم العالم» الذى يرسم ملامحه ويعيشه ويكتبه كل شعوب العالم ، ولكى يكون هذا الحلم عادلا يجب أن يعترف بفضل وإنجازات العقل المصرى . هل نحن مستعدون لهذا الحلم ؟ وهل تقبل أمريكا أن يشاركها الآخرون هذا الحلم ؟

منذ آلاف السنين ضيع المصريون والعالم «حلم العالم» الفريد هذا ، عندما جاء إخناتون وكانت مصر - مثل أمريكا الآن - تقود العالم ، لم يرد

إختاتون بناء هرم لنفسه ، لكنه أراد أن يجعل من كل مصرى «هرما» !
أراد أن يحرر المصريين وبنى الإنسان من أنفسهم ، ومنطقه بسيط : لو آمن
الناس بالله الواحد القادر وخافوه ، لما استعبد أو خاف بعضهم البعض .
والرسالة سهلة ولا تحتاج إلى عناء فى فهمها ! ولكن العالم والمصريين -
للأسف - ضيعوا «حلم العالم» الأول .

وإذا أراد المصريون العودة إلى التاريخ مساهمين ورواداً فى حلم العالم
المطلوب الآن ، فعليهم أن يستعيدوا ذاكرتهم كمعلمين وأساتذة ، فلن
يساهم فى حضارة اليوم إلا أحرار فى دول ديمقراطية ، ولقد عانى
المصريون كثيراً وحاربوا ونجحوا فى أن يستعيدوا أرضهم من عدو
اختلفت صورته فى كل عصر ، ولكن أمامهم الآن تحد أخطر وأصعب
وهو اكتشاف هزيمة العدو «بينهم» ، لا بد أن يحرروا أنفسهم من
أنفسهم !!! وهذا هو شرط العودة إلى التاريخ .

وجدى زيد

هذه أغنيتي لبلدي
وصلاتي لربي

الشخصيات

إخناتون	: فرعون مصر
نفرتيتى	: زوجة إخناتون
ميرى	: ابنته
تاى	: الملكة، أم إخناتون
زيمات	: أخت نفرتيتى، وزوجة حور محب
حور محب	: زوج زيمات، قائد القوات العسكرية المصرية
ريبتا	: كاهن آمون الأعظم
الكاهن الأول	
الكاهن الثانى	
الكاهن الثالث	
ماهو	: رئيس البوليس
توتو	: رئيس المخابرات
ميرورا	: رجل من عامة الشعب
بيك	: كبير الفنانين، ورسام القصر
الساحرات تارا	
الرجل المعجوز	

الشاب
رسول من الشام
كاهن المعبد
الصبى
مجموعة من الفلاحين والنسوة والأطفال
مجموعة من الحراس والجنود

الفصل الأول

المشهد الأول

(أحد شوارع مدينة تل العمارنة - «مدينة النور» تأتي أصوات الموسيقى من على بعد، رجال ونساء وأطفال يتطلعون في اتجاه الموسيقى وأضواء الاحتفالات خارج المسرح التي يبدو الأطفال مشدودين لها بشدة، ويبدأ البعض منهم في التحرك تجاه أضواء الاحتفالات لكن الآباء يمنعونهم . يبدو على وجوه الآباء وحركاتهم القلق والخوف رغم مظاهر الاحتفال . أسفل يسار ويمين المسرح، الكاهنان الأول والثاني وثلاثة من الحراس متخفين جميعا في عباءاتهم، يراقبون الناس في نفاذ صبر، الكاهنان حليقا الرأس ويتعلنان أحذية من ورق البردى وينظران إلى الناس في غضب واضح بينما يقف الحراس الثلاثة في تأهب ! .

يدخل صبيان يلعبان التحطيب والمصارعة وغيرهما من الألعاب ثم يتحركان إلى أعلى المسرح في اتجاه الاحتفال يتبعهم الأطفال محاولين الفكك من أيدي آبائهم لكن آباءهم يرفضون ذلك ناظرين في خوف إلى الحراس . . . !)

- الأب : (ممسكا بيد ابنه بقوة) لا ، قلت لا .
- الطفل : (فى توسل ، محاولا التخلص من يد أبيه) عاوز أروح معاهم .
- الأب : قلت لا إنت مبتفهمش ؟!
- الطفل : عشان خاطرى ، عاوز أشوف الفرعون الجديد .
- الأب : برضه لا .
- الأم : (إلى الأب) سيب الواد يروح زى العيال ؟
- الأب : (إلى امرأته ناظرا فى خوف وشك إلى الحراس والكهنة) بس يا ولية ! إنت دارية بحاجة ؟!
- الأم : خليه يشوف الحفلة
- الأب : لاحفلة ولا يحزنون ، خيلنا بعيد .
- الطفل : (لنفسه ناظرا حواليه) شكلها طين من أولها !
- الأب : (صارخا فى تدمير) سيبنى سيبنى !
- الرجل العجوز : (متدخللا) مش كده ، متعملش كده مع ابنك .
- الأب : (إلى الرجل العجوز) خليك فى حالك لو سمحت .
- الرجل العجوز : الأطفال أطفال يا ابنى ويجب
- الأب : (مقاطعا فى دهشة) يا سيدى ده ابنى وماطلبتش من حد يعلمنى أعامله إزاي !
- الرجل العجوز : (مبتسما فى هدوء) أنا مقلتش إنك مش عارف تعامله يا بنى .

يقترب من الطفل غير واع بوجود الكهنة أو
(أخراص)

(في رقة وهو ينحنى له)

عاوز تشوف الفرعون الجديد؟

هتشوفه. أنا كمان عاوز أشوف إختاتون، لكن لا بد

أن ننتظر ثلاث تيام. تعرف تعد ثلاثة؟

(يمسك بإصبع الطفل يعد عليها) بكره أول يوم. . .

واحد. . .

: (في سعادة) اثنين. . . ثلاثة. . .

: اليوم الثالث هو يوم الاحتفال الكبير وفيه يلبس مولانا

إختاتون التاج.

(الكاهن الأول يتبادل النظرات مع الحارس الأول

الذى يتحرك ناحية العجوز ويقف خلفه دون أن يعي

العجوز ذلك).

: في اليوم الثالث فيه حلويات وحاجات حلوة كثيرة،

في اليوم ده هتشوف إنت وأصحابك إختاتون. . .

هتشوفه فرعون جديد غير كل اللي سبقوه،

هتشوف. . .

الحارس الأول : (في عنف إلى العجوز) إنت بتتكلم كثير!

العجوز : (مندهشا وخائفا) أنا بس. . .

الحارس الأول : كفاية. مش عاوز أسمع. روح بيتك!

(يدفعه بعنف) روح!

(يخرج العجوز، ويعود الحارس إلى حيث كان ناظراً
إلى الآخرين في تهديد)

الأب : (إلى امرأته وطفله) جالكم كلامي؟ أنا عارف . . .

الحارس الأول : (إلى الأب في حدة) بتقول إيه؟

الأب : (ناظراً إلى السماء) مفيش . . . أنا بس كنت بقول
إن شكلها كده هتمطر .

(إلى امرأته وطفله) يلله يا ولية، يلله يا واد، ده حتى
القعدة في البيت حلوة!

(يخرج الثلاثة)

(صمت)

(ما زال الحارس ينظر إلى الجمهور الذي تزايد فيه
الخوف والقلق)

رجل : (ناظراً إلى السماء محاولاً إخفاء خوفه) فعلا هتمطر
جامد هترخ، وكمان البرد هيلسوع!

(وقفة)

الكاهن الثاني : (إلى الآخرين كمن يحاول إقناعهم) البيت بأه
دفا . . . ومريح . . . مريح جدا مش كده؟!

(يتبادل الناس النظرات قبل أن يخرجوا، كل فى اتجاه بيته)

الكاهن الثانى : (إلى الكاهن الأول) نفايات، جنباء!

الكاهن الأول : منافقين جهلة!

(صمت)

(تدخل مجموعة من العامة يقودهم شاب يحمل صور الفرعون الجديد، لكن الحارس الثانى يقف فى طريقهم)

الحارس الثانى : على فىن؟

(إلى الشاب) رايح على فىن إنت وهو؟

الشاب : فيه إيه؟

الحارس الثانى : (وهو يضربه بالعصا على كتفه) أنا اللبى بسأل مش إنت. (يضربه مرة أخرى) واخذ التنايلة دول ورايح على فىن؟

الشاب : (يحاول أن يرد الضربة، لكن الحارس الأول يعاجله بضربة من الخلف) بتضربنى ليه؟ فيه إيه بتعاملونا كده ليه؟ هو إحنا عبيد؟

الحارس الأول : (يضربه ثانية) بطل كلام فارغ!

الحارس الثانى : (منتزعا الصور من الشاب) إيه ده؟

(ينظر إلى الصور ويعطيها إلى الكاهن الأول الذى ينظر إليها هو الآخر قبل أن يتاولها إلى الكاهن الثانى)

الشاب : (فى ثبات رغم ارتباكك) صور مولانا الفرعون الجديد

واحنا رايعين الاحتفالات قدام المعبد .

فيه مشكلة؟

(يتبادل الحراس والكهنة نظرات سريعة ذات معنى)

الكاهن الثانى : (يخطو ناحية الشاب فى هدوء) يبدو إنك ابن ناس

مين والدك؟

الشاب : ناخت خامو .

الكاهن الثانى : (يكتب الاسم محاولا أن يتذكر) ناخت خامو . . .

من دوقما؟

الشاب : أيوه .

الكاهن الثانى : إنتم عيلة كبيرة . (وقفة) (مفكرا) دوقما فى وسط

الدلتا، بعيدة عن هنا، إيه اللى يخليك تيجى من

هناك لهننا وتسافر المسافة دى كلها عشان تشترك فى

أمور مشبوهة؟

الشاب : أمور مشبوهة ! أنا هنا مع أصحابى جاين نحضر

حفل تتويج الفرعون الجديد إخناتون، والصور دى

صوره!

الكاهن الثانى : (مقاطعا فى حدة) لا . مش صور الفرعون . الفرعون

ميلبسش زى الناس العادين!

وقفة

مين إداك الصور دي؟

الشاب : معرفش .

الكاهن الثانى : (إلى الحارس) خده !

(الحارس يقتاد الشاب من ياقته فى عنف)

الشاب : (صارخا وهو يختفى) ماتعملش كده معايا، اعرف

إنت بتعامل مين ! أنا معلم أربى أجيال !

الكاهن الثانى : (كأنه لم يسمع كلمات الشاب - يتحول إلى الآخرين

مهددا) وإنتم؟

(الجميع لا ينطقون خوفاً)

(وقفة)

(صارخاً فى لهجة أمرة)

يلله . . . يلله إنت وهو ! على بيوتكم ، . . . يلله !

(يختفى الجميع) (وقفة)

(إلى الحارس الثانى) خد الشارع ده لغاية المعبد .

(إلى الحارس الثالث) وإنت الشارع الثانى .

مش عاوز حد من المنافقين دول فى الشوارع ، صور

الكافر شيلوها ، متخلوش حد يمشى بيها فى

الشوارع .

(يخرج الحارسان)
(يخفى صوت الموسيقى) (صمت)

(يسود الظلام المسرح كله باستثناء بقعة شاحبة تسمح
برؤية الكاهنين)

الكاهن الثانى : (يتجه إلى أعلى المسرح مفكرا، ويعود إلى الكاهن
الأول) عليك أن تراقب الحراس وتنفيذهم للأوامر،
لا تثق فى أحد!

الكاهن الأول : وإنت؟

الكاهن الثانى : سيدنا الكاهن الأعظم يصل إلى هنا قبل نص الليل،
معايأ رسالة منه إلى الراجل بتاعنا فى القصر. زى ما
قلت لك، خد بالك ولا تثق فى أحد، ما تنساش
هنتقابل كلنا ورا المعبد بعد نص الليل!

إظلام

المشهد الثانى

منتصف الليل خلف المعبد، رعد وبرق .
(يدخل الكاهن الثانى وفى يده الصور ، يتبعه الكاهن
الأول . ما زال الكاهنان يتخفیان فى عباءتيهما)

الكاهن الثانى : (ناظرًا حوالیه) المكان آمن !
الكاهن الأول : أيوه .
الكاهن الثانى : (ناظرًا إلى السماء) النجم الجنوبى ظهر . فيضان
السنة دى هيفرق الدنيا !
الكاهن الأول : الظاهر كده !
الكاهن الثانى : بدأت الميه تغطى الشط ، حظنا حلو ، كل رجالتنا
وصلوا هنا قبل ما تسوء الحالة .

(يخلع عباءته) (وقفه)

الكاهن الأول : (يخلع عباءته) سيدنا الكاهن الأعظم يعرف يوصل
هنا؟

هيجى مع النائب سوكا. وسوكا يعرف.

(يتوقف مصغيا السمع)

هس فيه حد جاى

(يدخل الكاهن الأعظم ويتبعه سوكا الكاهن الثالث
يتخفى كل منهما فى عباءته)

الكاهن الثانى : (وهو يجرى ملاقيا الكاهن الأعظم) سيدى
سيدنا المعظم (يركع ويقبل يديه) شكرا للآلهة على
وصولكم سالماً وبخير.

الكاهن الأول : (راكعا يقبل يديه) سيدنا المعظم !

الكاهن الأعظم : لقد كان طريقا طويلا شاقا.

(يخلع عباءته ويتبعه فى ذلك دون تفكير نائبه سوكا)
(يبدو الكاهن الأعظم مرهقا ومجهدا ومهموما،
تخطى الخمسين، حليق الرأس، يرتدى تنورة طويلة
فضفاضة، وشاحا أسود يلتف حول كتفيه وصدره،
ورغم سنه المتقدم، تبدو عليه ملامح القوة والنشاط،
وتوحى سمات بنيانه القوى بالثقة والقدرة والدهاء
الدفين)

الكاهن الثانى : كيف حال طيبة يا سيدى؟

الكاهن الأعظم : لقد حطموا معبدا آخر من معابدنا عندما جاء الكافر لحضور جنازة أبيه الملك .

الكاهن الثالث : فى مرارة لم يستطع أن يصبر سبعين يوما نحضر فيها جسد والده لرحلة الخلود!

الكاهن الثانى : (فى غضب) والناس يا سيدى ؟!

الكاهن الأعظم : الناس منقسمة على نفسها بين ولائها للآلهة وللعائلة المالكة .

(وقفة)

لكننا سننتصر بفضل آلهتنا . أين توتو ؟

الكاهن الثانى : قال إنه سيأتى متأخرا بضع دقائق .

الكاهن الثالث : (فى احتراس) سيدى . . . يجب أن نعتمد على أنفسنا فقط ، هل تثق فى توتو يا سيدى ؟

الكاهن الأعظم : نعم أثق فيه ، لا بد أن تثق فى هؤلاء الذين يفعلون كل شئ وأى شئ من أجل طموحهم ، جاءنى توتو منذ سنوات يبلغنى عن أخيه ويشى به ، لهذا زرعت فى القصر الملكى .

الكاهن الأول : (مدهشا) خان أخوه ابن أمه وأبوه ؟!

الكاهن الثالث : إذن يخون أى إنسان !

الكاهن الأعظم : فقط إذا لم تعطه ما يريد ، ولقد أعطيناه الكثير وما زال لدينا الكثير الذى يطمع فيه ، أثق فيه لأننى أعرف

ثمته! (يدخل توتو، له وجه ممتلئ وعينان جاحظتان،
تشى بطموح قاس)
(إلى توتو) هذا هو صديقنا العظيم! مرحبا بك يا
توتو.

توتو : (يركع ويقبل يديه) سيدنا الكاهن الأعظم.
الكاهن الأعظم : (متفرسا فى وجهه) هل عندك أخبار يا توتو.
توتو : أخبار سيئة يا سيدى.
الكاهن الأعظم : وهى ؟
توتو : لقد اعتمد الأمير قرارات يعلنها بنفسه يوم التتويج.
الكاهن الأعظم : أية قرارات؟
توتو : بعد يوم التتويج مباشرة، لن تكون هناك عبادة فى
المعابد لآمون والآلهة الأخرى ولن يكون لكهنتهم
مناصب، ويتم التخلص من كل الصور ورموز هذه
العبادات من كل المعابد!

(تأخذ الصدمة بالجميع)

الكاهن الأعظم : (فى هدوء رغم التوتر) قلت إنه اعتمد هذه القرارات؟
توتو : نعم اعتمدها وسيعلم أن إلهاً جديدا قد أوحى إليه أنه
الإله الواحد الحقيقى، وأن كل الآلهة الأخرى زائفة!
الكاهن الأول : ألتهنا زائفة!

(صمت)

الكاهن الثالث : لا بد أن نفعل شيئاً يا سيدى وقبل أن يتوج ، سيهدم معابدنا بعد تتويجه ثم يتخلص منا نحن كهنة آمون والآلهة الأخرى !

الكاهن الثانى : وسيأخذ أراضينا !

الكاهن الأول : ونسواناً وبيوتنا !

الكاهن الثالث : (يخطو ناحية الكاهن الأعظم) ماذا ننتظر يا سيدى؟ إذلال أكثر؟

(وقفة)

الكاهن الأعظم : متحاشياً نظراتهم الملحة ، يذرع المكان جيئة وذهاباً ، ثم يلتفت إليهم - فى هدوء -

لا تجزعوا يا أصدقاء .

(متجها ناحية الكاهن الثالث) تعجبني شجاعتك يا سوكا ، ولكن إذا كنت ستفقد كهنة مصر يوماً ما ، فعليك أن تكون صاحب رؤية واضحة تماماً تساعدك على اكتشاف حكمة الآلهة .

الكاهن الثالث : لكن يجب ألا نضيع الوقت يا سيدى .

الكاهن الأعظم : (فى حدة) لا . نحن لا نضيع الوقت .

(وقفة)

لقد توقعت كل ذلك . الأمير شاب أحمق ، وتوقعت أنه سيدفع الأمور هكذا ، لكن ذلك سيكون في صالحنا .

الكاهن الثالث : كيف؟

الكاهن الأعظم : إن آلهتنا مستقرة في قلوب وعقول الناس منذ آلاف السنين ، وهذا الحالم المتسرع لا يستطيع أن يغير ذلك . (ينظر حوله ويلمح سلماً خشبياً عند الحائط فيتجه نحوه)

مصر في أيدينا (يمسك بالسلم مشيراً إليه) نحن على القمة وفي كل مكان هنا أما الأمير فلم يكن متواجداً في كل مكان مثلنا (مشيراً إلى رأس السلم) مكث والده هنا سبعة وثلاثين عاماً ، ولم يثق به أبداً ؛ لأنه يعرفه ، وحتى عندما مرض في العامين الأخيرين من حكمه أجبر هذا المارق على الخروج من طيبة بدلاً من أن يسمح له بالاستمرار والمشاركة في الحكم . (يبتعد عن الحائط) وجاء المارق هنا إلى الصحراء ليبني مدينته ، لكننا لا نسمح له أن ينهي ما بدأه . أعدكم أيها الأصدقاء أن ما بناه سيصير خراباً عاجلاً .

(وقفة)

(إلى توتو) توتو

توتو : سأكون أول من يضرب
الكاهن الأعظم : (مقاطعا) لا لم نصل إلى هنا بعد .

(وقفة)

كنا مستعدين لمواجهة في طيبة ، لكن الأحمق جعل
مهمتنا أسهل ، سنهزمه هنا .

(وقفة)

لدينا الكثير نفعله قبل التويج . (إلى توتو) كل همسة
في القصر يجب أن تحيطنا بها ، ولا تغفل عن
حور محب وغريتك ميرورا !

توتو : سأفعل ذلك يا سيدي .

الكاهن الأعظم : (إلى الكهنة) هناك الكثير من العمل السرى في
الشوارع بين الناس !

الكاهن الثانى : (يعطيه الصور) وجدنا هذه الصور مع شاب منذ
ساعات قليلة .

توتو : (ناظرا مع الكاهن الأعظم إلى الصور)

نفس الملابس المضحكة التى يرتديها ، إنه يذهب إلى
القرى على الشط الآخر للنيل متخفيا فى هذه
الملابس !

الكاهن الأعظم : لماذا ؟ !

توتو : لا أعرف .

(وقفه)

الكاهن الأعظم : (مفكرا- فى اهتمام واضح) هل يتعرف عليه الناس
توتو : لا .
الكاهن الأعظم : (فى رضا) هذا حسن !

(وقفه)

(إلى الكاهن الثانى) ماذا فعلت مع الشاب؟
الكاهن الثانى : أخذناه إلى أحد كهوفنا فى الجبل .
الكاهن الأعظم : لا تطلق سراحه حتى ننتهى ، هل وصل كل رجالنا من
طيبة ؟
الكاهن الثانى : نعم يا سيدى ومستعدون فى الجبل .
الكاهن الأعظم : حسنا لآلهتنا الكلمة الأخيرة .

(وقفه)

(متجها إلى نصف المسرح)
هذه لحظة خطيرة فى تاريخ مصر ، إننا لم نسع إلى
هذا الصراع .

(يتحركون ويلتفتون حوله تحت بقعة ضوء واحدة)
لم نصل إلى النهاية بعد .

(وقفة)

- علينا أولاً أن نهزمه فى شوارع هذه المدينة وبين الناس !
الكاهن الثانى : الناس لا يمكنها فعل شىء !
الكاهن الأول : الناس لا حول لهم ولا قوة !
الكاهن الثالث : الناس ليس لها علاقة بما يحدث !
الكاهن الأعظم : غير صحيح الناس ليس لها حول ولا قوة ، ولا
يمكنهم فعل شىء لكننا يجب أن نبقىهم بعيدين عما
يحدث !
هذا هو العامل الحاسم : أن نجعلهم لا يفعلوا شيئاً !
الكاهن الثانى : كيف ؟
الكاهن الأعظم : كما فعلنا معهم فى طيبة وكل مكان فى مصر ، أريد
شائعات هنا ، فى كل مكان بالمدينة . فى الأيام القادمة
الثلاثة ، ازرعوا شائعات تمتد جذورها ثم تؤتى ثمارها
سريعاً وقبل الحصاد عندما نواجهه فى يوم التتويج !

(وقفة)

- أريد الناس عاجزين عن فعل أى شىء ، بعدها يمكننا
فعل كل شىء . وأى شىء !
سنجعله يدفع ثمن كل ما فعله معنا !
إظلام

المشهد الثالث

فناء معبد بقرية على الجانب الآخر من النيل المواجه
لتل العمارة، الفلاحون ملتفون حول صبي يرتعد
خوفا ويحمل كيسا من الحبوب، بينما الكاهن
يجوب المكان جيئة وذهابا، رامقا الصبي فى نظرات
غاضبة بين الحين والآخر .

بين الفلاحين يقف إختاتون واثنان من الحراس
يراقبون ما يحدث يتخفى إختاتون والحارسان فى
ملابس عادية لا تنم عن كنيّتهم .

: (يتجه إلى أعلى المسرح ثم يواجه الجمهور - فى لهجة
مسرحية) يا إخواننا كيس الحبوب ليس مشكلة ولكنها
مجرد بداية!

الكاهن

(صارخا) إنها البداية ، والآلهة وحدها تعرف ما الذي
يمكن أن يحدث بعد ذلك !
(يتجه ناحية الصبي ويقف أمامه مباشرة ناظرا في
عينيه بحدة ، بعدما يعود مخاطبا الفلاحين
والجمهور)

هل تنتظر يا جماعة أخير ؟
هل تنتظر حتى نرى هذا الصبي يسرق شيئا أكبر ؟
هل تنتظر حتى نراه يسرق ويعلم غيره السرقة ؟
هل تنتظر يا جماعة أخير ؟ !

(صمت)

كلا وحق آلهتنا ! كلا ثم كلا ثم كلا !
أكاد أسمعكم جميعا وأنتم تقولون مثلي كلا !

(صمت)

لكننى أريد أن تعرفوا أن الشيطان داخله هو
الذى دفعه لأن يسرق ، نعم إنه الشيطان داخله !
ولهذا (نظر إلى أحد أتباعه نظرة ذات معنى)
ولهذا سوف نعاقب الشيطان داخله !
(يتجه التابع ومعه سوط نحو الصبي ، فيخلع عنه
قميصه ويقوده إلى وسط المسرح للجلد)

إخنا تون : (يخطو إلى الأمام مواجهها الكاهن) إنت سألت الولد سرق ليه؟

الكاهن : (يتحول إلى إخنا تون- فى عنف)، عففوا، لم أسمعك؟!

إخنا تون : إنت سألت الولد ليه عمل اللى عمله؟

الكاهن : (صمت، الجميع يتابع ما يحدث فى خوف وترقب)
(فى تحد وعنف إلى إخنا تون) من أنت؟ لم أرك هنا من قبل!

إخنا تون : (فى هدوء) أنا بسألك إنت سألت الولد ليه سرق شوية القمح دول؟

الكاهن : وأنا أسألك من أنت؟

إخنا تون : إخنا تون.

الكاهن : (مرتبكا) من؟!

إخنا تون : أنا إخنا تون ملك مصر

(تبدو على وجوه الكاهن والقرويين الصدمة)

(يتحرك إخنا تون إلى الصبى وإلى الكاهن وهو يفك

وثاقه) ما سألتوش ليه سرق؟

الصبى : (باكيا) معندناش حاجة ناكلها.

إخنا تون : (فى حنان) فين أبوك؟

الصبى : مات!

(وقفة)

إخاناتون

: (إلى الكاهن) تقول إنت إيه دلوقتى؟ تقول إيه ولا

تعمل إيه إنت والأصنام الحارسة اللي بتعبدها؟

(إلى الحارسين) ادخلوا جوه المعبد وحطموا كل

الأصنام! خلينا نشوف الآلهة بتاعتهم هتعمل إيه!

(يختفى الحارسان فى سرعة داخل المعبد)

(تسمع أصوات تحطيم الأصنام بالداخل، بينما يقف

الكاهن مصدوما عاجزا، والناس بعضهم فى رعب لا

ينطقون وآخرون يتسللون فى خوف إلى بيوتهم)

إظلام

المشهد الرابع

(حجرة فى قصر إخناتون، الوقت صباحا، كبير المهندسين والنحاتين بيك يتأمل فى إعجاب بعض الصور على ورق البردى ويبدو غير واع بوجود توتو تأتى أصوات الموسيقى من على البعد)

: (إلى نفسه بصوت عال بينما ينظر إلى إحدى الصور)

الجميل والصادق، الصادق والجميل!

العلاقة بين الاثنين عميقة ومثيرة!

(يتجه ناحية توتو ويقف أمامه مباشرة ويبدو كأنه لا

يزال لا يعى بوجوده) الصادق والجميل!

: (يحاول أن يكون رقيقا) هل تكلمنى يا بيك؟

بيك

توتو

بيك : (بصوت عال ، لنفسه ما زال) الصديق والجمال كل

صادق جميل ! معلّمى ومليكى إختاتون

توتو : (مقاطعا) إنه فى حديقة القصر .

بيك : (غير مبال بما قاله توتو) مليكى ومعلّمى إختاتون يقول

إن كل ما هو صادق جميل ! (ناظرا مرة أخرى إلى

الصورة) وهذه الصورة صادقة فعلا ، عشان كده لا بد

أن تكون جميلة ، وهى فعلا جميلة !

(إلى توتو) إيه رأيك يا توتو فى الصورة دى .

توتو : (فى فتور) ظريفة !

بيك : مش ده الموضوع ، الصورة دى جميلة لأنها صادقة ،

دى صورة مليكنا إختاتون زى ما هو فى الحقيقة ، وده

جديد فى الفن ، مفيش ذواق ولا تحميل ، مفيش غير

الحقيقة ، زى ما هو فى الواقع ، عشان كده الصورة

جميلة !

(وقفه)

إزاي تحب صورتك يا توتو؟ عاوزها زى ما إنته فى

الحقيقة ، واللا زى ما تحب الناس تشوفك ؟ !

(وقفه)

الصدق جميل ! كل صادق جميل
(مفكرا) لكن السؤال دلوقت . . . هل كل جميل
صادق؟

(يدخل حور محب، تنم ملامح جسده القوى
ووسامته الظاهرة عن شخصية جديرة بالثقة، لكنه
يبدو مهموما وغير سعيد) أهلا برجل السيف، قائد
الجيوش المصرية، نحن نتكلم يا سيدى عن العلاقة
بين الجمال والصدق، والسؤال . . .

: (مقاطفى ضيق) إحناف إيه وإنف إيه يا بىك!
(إلى توتو) أين الملك يا توتو؟

: يتناول إفطاره مع العائلة فى حديقة القصر الخلفية .

: أريد التحدث إليه، الموضوع عاجل!
(أصوات تأتى من خارج المسرح، يدخل إخناتون
ونفرتيتى وابنتهما الصغرى ميرى)

(يبدو إخناتون نحىلا وضعىفا، ملبسه بسيطة عادية
مثل التى رأناه بها فى الصورة. يدعو ظاهره إلى
الشفقة والإعجاب معاً، وتنم قسماى وجهه ونظرات
عينيه القلقة عن حزن عمىق وهموم من يبحف عن
الحققة، رغم هذا له حضور أسر يدركه المرء مع مرور
الوقت)

(تردى نفرتيتى فستانا أبيض فضفاضا يظهر جمالها
وأناقفها، غير أن وجهها وحركفها تكشف عن حىاة
جافة غير مكفملة وغير مفعقة بشكل جوهرى)

حور محب

توتو

حور محب

ميرى : (تجرى وراء أبيها فى سعادة - فى توسل) مرة كمان ،
مرة كمان !

إخنتون : (مبتسما) مش وقته !

ميرى : عشان خاطرى مرة كمان .

إخنتون : مرة واحدة ! (يحملها فوق كتفيه لعدة ثوان ثم يعيدها

إلى الأرض وهى تصرخ فى سعادة غامرة)

(إلى الآخرين بعد مغادرة ميرى) صباح الخير

(يلحظ توتو وهو يبالغ فى انحناءاته لتحيته على

عكس بيك و حور محب اللذين كانت انحناءاتهما

خفيفة غير مبالغ فيها - إلى توتو)

أنا قلت إحنا بنسجد لله وحده بس !

توتو : (ناهضا فى حجل) عفوا أيها الملك نسيت !

وأعتذر أرجو أن تسامحنى . . .

إخنتون : (مقاطعا ، إلى حور محب مبتسما) صاحى بدرى

النهاردة !

(متفرسا فى وجهه) فيه حاجة شاغلأك ؟

(وقفه)

فيه أخبار عندك عن أزورو !

حور محب : أنا هنا لنفس السبب يا مولاي

(إلى بيك) طيب نشوف اللى عند بيك الأول .

إخنتون

- بيك : كل شىء تقريباً جاهز لحفل التتويج يا مولاي .
- إخنا تون : تقريباً؟!
- بيك : مدخل المدينة يا مولاي يحتاج إلى بعض الوقت .
- إخنا تون : ليه؟
- بيك : لم يصل بعد الجرانيت الأحمر من أعالي النيل .
- إخنا تون : جرانيت أحمر! ليه التبذير؟!
- بيك : تبذير! المناسبة عظيمة يا مولاي!
- إخنا تون : ولو، مطلوب البساطة والاعتدال، اشتغل بالموجود،
- بيك : إيه تانى؟
- بيك : (يريه الصورة) أنتجنا كمّاً كبيراً من صورتك يا مولاي .
- إخنا تون : (ينظر إلى الصورة) معقولة، كده الناس تبقى مستعدة!
- نفرتي : (وقفة - إلى نفرتي) رأيك إيه فى الصورة يا مليكتنا العزيزة؟ معقولة؟
- بيك : (فى قليل من الحماس) طبعاً يا مولاي .
- بيك : هناك صورة أخرى لمولاي ومولاتى، وصور لمولاي والعائلة، وصور لمولاي و... .
- إخنا تون : (مقاطعا يربت على كتفه مبتسماً) كفاية صور عني وعن عيلى، عاوزك إنت وكل الفنانين تروحو للناس على النيل وفى الغيطان .
- بيك : وصوروا كل شىء على حقيقته وطبيعته!

بيك : سننعل يا مولاي !
(ينحنى ويخرج)

نفرتي : (في محاولة لكسر حالة التوتر - إلى حور محب) كيف
حال أختي زيمات؟ شفتها مرة واحدة من يوم ما جيتو
من طيبة!
حور محب : بخير يا سيدتي .

(وقفة)

إخناتون : (إلى حور محب) وصل رسول من تونيب .
(إلى توتو) اسمحواله بالدخول .
توتو : (ينحنى ، خارجا) أمر مولاي .

(وقفة)

حور محب : (يخطو ناحية إخناتون بعناية) يجب ألا نثق في أزورو
يا مولاي!
إخناتون : (مشجعاً) يعنى . . .
حور محب : يجب أن نرسل في الحال قواتنا إلى سوريا !
(يدخل الرسول ويبدو عليه التعب والإرهاق ،
ملا بسه متربة وفي حالة يرثى لها من وعناء السفر)

إختاتون الرسول

: نسمع صديقنا من تونيب .
: (ينحنى فى احترام شديد) مولاي فرعون مصر
العظيم ، (يفتح الخطاب) هذا خطاب من حاكم
تونيب إلى مولانا ملك مصر العظيم (يقرأ)
نحن أهل تونيب ، خدام مولاي ساجدين عند
أقدامكم ، ندعو لكم بالصحة والخير ، مولاي لقد
سقطت مدينة ناي والآن مدينتكم تونيب تذرف
دموعها ولا يقدم لها أحد يد المساعدة ، ولقد أرسلنا
الاستغاثات طوال العشرين سنة الماضية إلى مولانا
ملك مصر ، لكننا لم نلقَ إجابة !
(منحنيا يعطى إختاتون الخطاب ثم يخطو إلى الخلف)
: (ممسكا بالخطاب - إلى توتو الذى يجرى لأخذه) خليه
يرتاح ، الإجابة النهاردة .
(يخرج توتو والرسول) .

إختاتون

(وقفة)

(إلى حور محب) إيه رأيك ؟
: جئت هنا وأنا لا أعلم شيئا عن هذا الرسول ؛ لأننى
قلق بخصوص ما يجرى فى سوريا منذ سنين ، وهذه
الرسالة تعنى مولاي أن اقتراحى بإرسال القوات إلى
سوريا فى الحال هو اقتراح سليم .

حور محب

(توتو يدخل ثانية)

- إخنا تون : (إلى توتو) الملكة الأم هتوصل دلوقتى، إنت وماهو تكونوا فى استقبالها .
- نفر تيتى : أنا كمان هكون فى استقبالها .

(تخرج)

- إخنا تون : (يقف مفكرا) المشكلة عمرها عشرين سنة!
- حور محب : إذن يجب أن لا نضيع وقتنا أكثر فى الانتظار!
- إخنا تون : كتبنا لأزورو؟
- حور محب : أنا لا أثق فيه، ولا يجب أن نضيع الوقت فى الكتابة إليه وانتظار الإجابة، إنه وضع ويزرع الوقيعة بين البلاد بعضها البعض؛ كى يزيد فى أرض بلده على حساب الجميع، يتظاهر بأنه صادق معكم ومع الحشيين، وهو فى الحقيقة محتال كذوب مع كليكما، بل إن كذبه وخسته موجهة أساسا (يتردد) إليكم!
- إخنا تون : (يبتعد عنه ويتجه إلى منتصف المسرح، ثم يقف مفكرا) عاوزنى أبعت قوات دلوقتى؟
- حور محب : نعم يا مولاي، لقد دمر مدينة ناى، وسندمره، العين بالعين والسن بالسن!
- إخنا تون : العنف بيخلق عنف مالوش نهاية يا حور محب .

(صمت)

حور محب

: مولاي أزورو مخادع وكل ما يريده هو الوقت وأنتم
(يتوقف) أقصد أننا نعطيهِ الوقت يا مولاي فيضم إلى
أرضه القبائل الأضعف في سوريا بعد قتالها وهزيمتها
بعدها يتحول إلينا وتلك هي بدايه انهيار (يتردد)
ال... الإمبراطورية المصرية.

إخناتون

: (في هدوء وحسم) الانهيار بدأ هنا يا عزيزي حور
محب!

عاوزنى أبعت قوات بره والبيت من جوه فاسد، أنا
بتكلم عن الأولويات، ويبدو إنك مش شايف العلاقة
بين اللى حاصل على حدودنا والقلب الفاسد،
الانهيار اللى بتكلم عنه بدأ من جوه ! (وقفه) الناس
في طيبة وفي كل مكان بمصر مش سعيده ومش
مرتاحة؛ لأن الظلم والجشع والاستغلال في كل
مكان، الكهنة وأصنامهم وراء كل ده ! أنا معركتي هنا
يا حور محب، وعاوز أبتدى صح، الحمد لله الذي
لا إله إلا هو، الذي هداني إلى الطريق المستقيم.

(يتجه ناحية منتصف المسرح، ثم يعود إليه - في ود
صادق) البداية نصلح القلب... قلب البلد، وفي
نفس الوقت نكتب لأزورو نطلب منه يبني اللى
هدمه.

حور محب

: (مصدوما) لن يستجيب يا مولاي!

إخناتون

: إدى له فرصة.

حور محب : سيقظن أننا نخافه .
إخنا تون : لا إحنا مش خايفين ، نعطييه فرصة ونعطي أنفسنا
 فرصة نغير فيها كل شيء !

(وقفه)

الناس لا بد تتعلم وتعيش في حب وسلام مع
 بعضها ، وده ممكن يكون غريب بالنسبة لهم بعد سنين
 طويلة من الاضطهاد والحروب وسفك الدماء ، لكن
 مصر النهاردة بتقود العالم ولا بد تكون قدوة ، وفي
 النهاية هيعم الحب والسلام يا صديقي !

حور محب : حب وسلام لن يرى العالم الحب والسلام ولو بعد
 مائة عام من الآن ! (وقفه) أخشى يا مولاي أن هذه
 المثاليات لن تمكنا من السيطرة على الإمبراطورية
 ونفشل و

إخنا تون : (مقاطعا) لا لا . لن نفشل ، ربى هو الرحمن ، هو
 السلام والحب ، يغمر حبه الكون والحياة كلها إنسانها
 وحيوانها ، وحتى زهورها الضعيفة (فى لهجة
 حاسمة) نبدأ بعد التتويج مباشرة ، وعاوزك تكون
 مستعد .

(رغم صمت حور محب ، تنم ملامحه عن عدم
 الرضا والرفض)

حور محب : (ينحنى، مغادرا) مولای !
 إخناتون : (قبل أن يختفى حور محب) حور محب!
 (يستدير إليه حور محب) طبعاً مش ممكن أجبرك
 تؤمن بالله الواحد الذى لا إله إلا هو، لكن أنا أعرف
 حبك لمصر، وهايجى يوم لا بد تختار!

إسلام

المشهد الخامس

(غرفة فى قصر إخناتون يدخل توتو وماهو، رئيس
الحرس . تأتى أصوات الموسيقى والتراتيل من جناح
داخل القصر)

ماهو : بالعافية وصلنا للشاطئ، والمملكة الأم وصلت بخير، حظنا
حلو، بس الفيضان هيعرق الدنيا!
توتو : ياريت!
ماهو : (مندهشاً)ليه؟!
توتو : دواعى الأمن!
ماهو : مش فاهم!
توتو : أهو ده أحسن حاجة بحبها فيك، الصدق، ناس كتيرة
مبتفهمش بس بيدعوا إنهم بيّفهموا، إنت مبتفهمش لكن

مبتدعش إنك بتفهم . بتقول الحقيقة ، إنك ما بتفهمش !

يا سلام على الصدق والأمانة !

ماهو : (فى رضا وخجل) شكرا شكرا .

توتو : (يقترب منه - كأنه سيفشى سرا) أقول لك يعنى إيه دواعى

أمن ، لما النيل يبقى هايج والفيضان يغرق الدنيا ، الناس فى

القرى على الشط الثانى مش هتقدر تحضر حفل التتويج ، ودى

معناها ناس أقل يحضروا ، طبعاً أنا أحب كل المصريين يشوفوا

تتويج أميرهم ، لكن أنا باتكلم هنا كرجل أمن ، إحنا نقدر

نتحكم فى الموقف تماماً لو كان عدد اللي هيحضر أقل على قد

ما نقدر ، إنت عارف البلد بتغلى !

ماهو : فهمت كلامك كله ، صح يا سيدى !

(وقفة) (تعلو أصوات الموسيقى والتراتيل)

توتو : (متطلعا إلى حيث تأتى التراتيل) حلوة جميلة ! بتحبها ؟ !

ماهو : أيوه .

توتو : أقصد إنت بتؤمن بالله الواحد الذى لا إله إلا هو ؟

ماهو : (مرتبكا) بصراحة يا سيدى أنا شايفها صعبة عليه إننى أو من

بياله مش قادر أشوفه ، لكن أنا بنحب مصر وبنحب الأمير . . .

توتو : (مقاطعا بسرعة) طبعاً طبعاً ، كلنا بنحب مصر ، كلنا بنحب

الأمير .

(وقفة)

(مبتسماً) أنا شفت الملكة بتقول لك حاجة وهى نازلة من
المركب ؟

ماهو : كانت بتسألنى على الأمير .

توتو : بأين عليها قلقانة !

ماهو : قوى !

(وقفه)

توتو : عشان كده عاوزك تسمعنى وتركز معايا يا ماهو ، إنت عارف

أعداء مصر والأمير ممكن يستغلوا الفترة الانتقالية دى ، لا بد
أن نصحصح قوى لآى أخطار جاية !

ماهو : طبعاً يا سيدى .

(وقفه)

إمبارح بالليل رجال ملثمين رعبوا الناس !

توتو : أنا عارف ، سيبك منها دى حاجة مش مهمة ، نزاعات
شخصية !

روح لشغلك دلوقتى وبلغنى بكل همسة فى القصر .

ماهو : بس لا بد أروح لميروزا دلوقت !

توتو : عشان إيه ؟ !

ماهو : مولانا عاوز يشوفه !
توتو : (يحاول أن يخفى اهتمامه) ليه ؟!
ماهو : مش عارف شكلها كده منصب جديد له .
توتو : منصب إيه ؟!
ماهو : معرفش هو راجل ابن حلال وناس كتير بتجبه . هروح دلوقتي
 أخلص الموضوع ده بسرعة !

(يخرج)

توتو : (لنفسه فى مرارة) منصب جديد . . . ميرورا ؟!
 يمكن رئيس وزارة! واللا الكاهن الأعظم للدين الجديد!

(وقفة)

لكن إشمعنى ماهو؟ ليه طلب منه مش منى يروح لميرورا؟!
 يمكن المنصب الجديد هو رئيس الأمن؟ . . منصبى؟!
 لا . لا . مش ممكن ، أنا أعطيت عمرى كله لخدمة مصر ،
 يبجى التنبل ده إالى مالوش أصل ولا فصل يركب ؟!
 (لا يستطيع أن يصدق) لا لا مش ممكن !
 (فى حدة صارخا) لكن ليه بيعت ماهو مش أنا؟ ليه؟

المشهد السادس

(نفس الغرفة، يدخل إخناتون والملكة الأم، يبدو إخناتون متفائلا على عكس أمه التي تظهر عليها علامات التوتر بوضوح)

إخناتون : أنا سعيد يا أمي إنك غيرتي رأيك، إنت هترتاحي هنا، وأنا متأكد هتيجي قصرك والمدينة الجميلة دي

تاي : (تقاطعه) شوف يا بني أنا تعبت، وأيامي قليلة، أنا هنا عشان حاجة واحدة، وإنت عارفها يا بني !
إخناتون : إيه؟

تاي : قلقانة عليك يا بني، إنت جيت طيبة عشان جنازة أبوك، ومكملتش السبعين ورجعت هنا وأنا عارفة

الى إنت ناوى تعمله، (فى توسل) يا بنى
(تردد ثم تسكت)

إخنا تون

تاى

: (بيتسم مشجعا) أنا باسمع يا أمى !
: أنا شفت أبوك بيعحكم الإمبراطورية دى على مدى
سبعة وثلاثين سنة، وأعرف المصريين إنت دلوقتى
فرعون مصر، لوحدك على العرش يا أمى .

إخنا تون

: (فى هدوء) عمري ما كنت لوحدى على العرش يا
أمى !

تاى

إخنا تون

: إنت شاركت فى الحكم ثلاثاشر سنة .
: (فى دعة) إنت عارفة كويس يا أمى إن ده مش
حقيقى، عمره ما سمح لى أعمل اللى أنا عاوز أعمله
فعلا (يتوقف) .

تاى

إخنا تون

: بسبب أفكارك !
: أفكارى؟! المنافقين والفاستدين خللوه يعتقد إنه أعظم
فرعون، وعشان كده لا بد بينى هرم رابع أعظم من
الثلاثة الموجودين، بقالنا سنين بنضيع البلد عشان
أعظم هرم، بنضيع كل شىء عشان مقبرة كبيرة ولسه
مانتهش !

(وقفة) (فى تصميم) وعمرها ما تنتهى !

تاى

إخنا تون

: تقصد إيه ؟
: إنت عارفة أقصد إيه، بتتكلمى عن أفكارى !

(وقفة)

بقالى سنتين بابنى المدينة البسيطة دى ، هنا بدايتى ،
التاريخ هيبتردى من هنا ، مش هابنى هرم ليه لكن
هاخللى كل مصرى يبقى هو نفسه هرم ، التغيير
هيبتردى من هنا يا أمى !

: (صارخة تقريبا) مش هيسمحولك !

: مين هم اللى مش هيسمحولى ؟!

: إنت عارفهم .

: الكهنة ؟

: الكهنة وأتباعهم هم كل المصريين .

تاى

إخنا تون

تاى

إخنا تون

تاى

(وقفه)

(تقترب منه وتمسك بيده ، فى توسل) أنا بشوف
أحلام وحشة . . . أنا . . . (تتوقف محاولة السيطرة
على نفسها ، تبعد عنه ، وتبدو كمن يسترجع الحلم ،
فى صوت ضعيف خائف) مش ممكن ! . أنا مش
عاوزاك زى !

(صمت)

: (يقترب منها ويمسك بيديها ، فى عاطفة) فى الملكة
الشجاعة اللى وقفت جنب جوزها الملك السنين
الطويلة دى ؟

إخنا تون

(ياخذها إلى منتصف المسرح) (وقفة)
 إيه اللي شاغلك يا أمى؟ قولى عاوزه إيه
 : اتعلم حكمة أبوك وأجدادك .
 : وإيه الحكمة دى؟
 : متواجهش الكهنة وآلهتهم .
 : (فى هدوء) ربى أمرنى إن هو وحده اللي يتعبد فى
 إخناتون أرضه .

(وقفة)

(ناظرا فى عينيها فى دفع) أمى ، إنت مصدقانى؟
 : إنت عمرك ما كذبت عليه .

(وقفة)

إخناتون : أمى ، أبويا سمح لى أكون معاه على العرش سنين
 قليلة قبل وفاته ، إيه اللي حصل؟
 ما نفعش وإنت عارفة منفعش!
 : مش هو لوحده المسئول !
 : إحنا الاتنين مسئولين ، ماينفعش اتنين يحكموا
 مصر ، وإذا كان ماينفعش اتنين يحكموا مصر ، يبقى
 ماينفعش بالنسبة للكون ، لا بد أن يكون للكون إله

واحد، ومش محتاجة نبى عشان يعرفها!

(وقفة)

إنت بتؤمنى بالله الواحد؟
: أنا قلت إنك عمرك ما كذبت عليه !
: دى مش الإجابة على سؤالى .

تأى
إخنا تون

(صمت)

: (تقترب منه) إدى لنفسك وقت .
: عاوز أبندى صح .
: الحكمة . . .
: (مقاطعا) أمى ، بتقولى أبويا وأجدادى كانوا عاقلين
وما وجهوش الكهنة وأصنامهم، إيه النتيجة، كل قرية
النهاردة لـ والمعابد أصبحت تجارة كبيرة،
والكهنة أثروا ثراء فاحش، والناس جعانة، حياتها
ضنك .

تأى
إخنا تون
تأى
إخنا تون

: متواجهمش كلهم فى وقت واحد . (وهى تفكر) أو
على الأقل بلاش مواجهة كاهن آمون الأعظم، ريتنا،
الراجل ده مش سهل، ذكى وله رؤية وجرىء .
: أنا مبخفش من حد وربى مش هيتخلى عنى .

إخنا تون

- تأى : حاول حل وسط
إخاناتون : مفيش حل وسط يا أمى .
(تأى تتجه ناحية الأريكة وهى تتمتم فى انفعال
ويأس) (تدخل نفرتيتى)
(إلى نفرتيتى) إنت فين يا نفرتيتى؟
نفرتيتى : مشغولة مع البنات .
إخاناتون : خليفهم يشوفوا ستهم الملكة الأم أنا فى الجناح .
(يقبل يد أمه ورأسها ، ويخرج)
(تجلس تأى على الأريكة ، واضعة رأسها بين يديها)
نفرتيتى : تحبى تشوفى بقيت القصر يا مولاتى؟ (تلاحظ انشغال
تأى فى أفكارها ومخاوفها تماماً) أمى الملكة!
تأى : (تلتفت إليها فى حدة) إنت مش شايقة اللى بيحصل!
جوزك هيصع مصر عشان حلم مستحيل وإنت ولا
هنا!

روقة

- إنت إيه بالنسبة ليه؟!
نفرتيتى : زوجة مخلصه!
تأى : (مندهشة للتعبير على وجه نفرتيتى الذى لا ينم عن
معنى) زوجة مخلصه! إيه الحكاية يا نفرتيتى؟
نفرتيتى : مفيش حاجة؟!

تای

: مش ممكن تكونى إنت نفرتيتى .
فین نفرتيتى الطموحة الجميلة التى نفتها نقاوة لولى
العهد؟ !

(وقفه)

نفرتيتى

: فيه واحدة ست تانية؟
لا .

تای

: الحريم؟ بيشفهم؟

نفرتيتى

: أبدا .

تای

: عشان خلفته بنات معندوش ولد؟

نفرتيتى

: (تشيح بوجهها بعيدا) معرفش ! حقيقى معرفش !

: حاسة إن فيه حاجة واقفة بينى وبين قلبه !

تای

: الكلام ده بقاله أد إيه؟

نفرتيتى

: من يوم ما نحوزنا !

تای

: (فى دهشة) إنت مجنونة؟ إنتو متجوزين بقالكم سنين

وعندكم عيال !

نفرتيتى

: ربما أكون أنا السبب .

تای

: إزاي؟

نفرتيتى

: أنا من أسرة عادية، ومعرفش أكون . . .

تای

: (فى حدة) كلام فارغ، أنا كمان من أسرة عادية .

(وقفه)

- نفرتیتی : قصدك تقولى إنه باعدك عن كل حاجة؟
- تای : لا يا أمى الملكة، مش عارفة أقولها ليكى إزاي (تحاول) هو أب عظيم وزوج عظيم بيخاف على شعورى قولى لكن (تتردد وتقف).
- نفرتیتی : لكن ايه؟
- تای : فيه فى قلبه وعقله حاجة مش قادرة أوصل لها!
- نفرتیتی : (وهى تنظر فى عينيها) متعرفيش هو هيعلم ايه فى حفل التتويج بعد يومين؟
- نفرتیتی : عارفة زى كل اللى فى القصر .
- تای : لا يا نفرتیتی إنت مش زى اللى فى القصر (تحاول أن تقف، فتجربى نفرتیتی لأخذ يديها ومساعدتها على الوقوف)
- نفرتیتی : إنت لسة طفلة . لا بد أن تثبتى ليه ولنفسك إنك مش زى كل اللى فى القصر، لا بد أن تشاركيه فى كل حاجة، وتكونى دايما معاه لما يحتاجك
- نفرتیتی : عمره ما احتاجنى ولا طلب . .
- تای : (مقاطعة) مش ضرورى يطلب، فين ذكائك يا نفرتیتی؟!

(وقفه)

جوزك فى خطر وإنت بتتصرفى زى الطفلة!

- فین حور محب؟ مع مین؟
 : یعنی إیه مع مین؟
 : یعنی رأیه إیه فی اللی هیعمله ابنی؟
 : معرفش!
 : (مصدومة) متعرفیش! أختك زیمات مراته
 ومتعرفیش! آخر مرة شفيتها إمتی؟
 : مرة واحدة من يوم ما جت من طيبة.
 : مرة واحدة!
 (تفكر مليا) فيه حاجة بتحصل! اسمعی یا نفرتیتی،
 إنت متعرفیش الدنيا کویس، لكن أنا تاي زوجة
 أمونحتب الثالث العظيم، شفت كتير وميخدعنيش
 الكلام المعسول ولا عبارات النفاق فی القصور،
 عمرك ما تسمحي لحد يخدعك.

(وقفه)

- فيه مهمة عاجلة ليكي یا نفرتیتی.
 : خير؟
 : عاوزه أعرف اللی فی دماغ حور محب، إنت تشوفی
 أختك وبذكاء تعرفی إیه اللی ييفكر فيه جوزها فعلا،
 جوزك ناوی يواجه الكهنة ويحطم معابدهم، ولازم
 نعرف رأی قائد الجيش.

نفرتيتي : أنا مستعدة أعمل أى حاجة عشان جوزى .
 تاي : عارفة يا نفرتيتي ، حاولى تشوفي أختك حالا
 دلوقتى .
 نفرتيتي : دلوقتى ؟
 تاي : أيوه ، مفيش وقت نضيعه ، أنا حاسة فيه حاجة
 بتحصل !

(تخرج نفرتيتي)

(إلى نفسها) رييتا . . الكاهن الأعظم رييتا . نفس
 الحدوده القديمة !

إسلام

المشهد السابع

(غرفة فى بيت حور محب، ترقد زوجته زيمات على الأريكة مستمعة إلى الأختين تارا، وهما ساحرتان متقدمتان فى السن يبدو بوضوح أن زيمات مخمورة، تتابع بغير اكتراث ما تفعله أو تقوله الأختان .

تشحرك الساحرتان فى شكل دائرة، بينما تقرعان الدفوف فى بطن، ثم تتوقفان وتجلسان على الأرض فى مقابل زيمات، وتفتحان زجاجتين مليئتين بالرمال، وتنشراه على أرض الغرفة، ضاربتين الدفوف فى حركة ميكانيكية عنيفة تؤدى فى النهاية بهما إلى حالة أشبه بالغشية والنشوة معا)

- ١١ تارا : شايقة . . . شايقة الرمل ها يطير . . . يطير فوق .
- ٢ تارا : بس الأول تحت . لا بد يطير تحت .
- ١ تارا : مش كثير .
- ٢ تارا : العظمة والملك ف سكتك !
- ١ تارا : شايقة التعبانين !
- ٢ تارا : وتاج مصر !
- ١ تارا : على رأسك !
- ٢ تارا : وعلى رأسه !
- زيمات : كدابة إنتى وهى ، سنين وإنتو بتكدبوا عليّه ، مفيش غير الكذب !
- ١ تارا : (صارخة دون النظر إلى زيمات) لا . . . الرمل عمره ما يكذب !

(وقفة)

- ٢ تارا : (مملية النظر فى الرمل) الخطوط والعلامات !
- ١ تارا : شايقة الخراب !
- ٢ تارا : مدينة بتتحرق !
- ١ تارا : رماد فى رماد !
- ٢ تارا : والتاج بيتحرك ، جايلك ، جايلك !
- زيمات : (ضاحكة) جايلى أنا و حور محب ؟ طب هنعمل إيه ؟
- ١ تارا : لا شىء !

- زيمات : (متعجبة) لا شيء! (ساحرة) مش هناخذ حاجة إذا
معملناش حاجة!
- تارا ٢ : غلط ، هاتخدوا كل حاجة عشان مش هاتعملوا حاجة !
- زيمات : (فى نفاذ صبر) كلامكم أَلغاز يا سحرة !
- تارا ١ : تعالى هنا تعالى ، وخطى الخطوط والعلامات سبع مرات .
- تارا ٢ : سبع مرات .
- (تنهض زيمات وفى يدها الكأس وتسير بغير ثبات إلى حيث
الساحرتين)
- (تدخل نفرتيتى ، وتندesh لما تراه ، فتقف شاخصة إلى
زيمات والساحرتين)
- نفرتيتى : إيه إللى بتعملوه يا زيمات ؟ !
- زيمات : (وهى تعود إلى الأريكة ، ضاحكة) لا شيء!
- (إلى الساحرتين) قولوا لملكة مصر إحنا مبتملش حاجة!
- نفرتيتى : (إلى الساحرتين) إنت وهى ، بره! بره!
- (تهرع الساحرتان للخارج)

(وقفه)

- زيمات : (لنفسها بصوت عال) نفرتيتى . . . أختى ، ملكة مصر هنا
إيه الشرف والتكريم ده !
- نفرتيتى : إنت لسه بتصدقى الأوهام دى؟
- زيمات : هو إنت مبتحبش الأوهام؟ ليه؟! كنت فى يوم من الأيام

بتحبيها، فأكرة الرجل العجوز اللى قال لنا هنبقى إحنا
الأتنين ملكات مصر، كنا أختين صغيرين و

نفرتي : (مقاطعة) زيمات

زيمات : دلوقتي إنت ملكة مصر عشان كده معدنيس بتحبي الأوهام!

(تضحك فى سخرية) تعرفى إنت إيه؟ إنت ملكة
الواقع، طول عمرك وإنت ملكة الواقع!

نفرتي : (مقاطعة) إنت سكرانة .

زيمات : عمرك ما حيتى الأوهام، أيوه، ملكة الواقع .

(ضاحكة) ده الشئ الوحيد اللى بحسبك عليه

(تشرّب) تعرفى إمتى وإزاي تبغى نفسك

نفرتي : (وهى تأخذ الكوب منها) خلاص، إنت مش واعية
بنفسك!

زيمات : كنت أول واحدة تعلنى إيمانك بالله الواحد، ساعتها

مفهمتش، لما قلتى لأبونا يروح للأمير يقول له إنك خلاص

سيبتى كل الآلهة وبتؤمن بالله الواحد، مفهمتش، لكن

فهمت بعد كده فى حفل السد لما شوفتك بترقصى،

وتستعرضى جمالك قدام الكل، خاصة (تردد) حور

محب

نفرتي : (تقاطعها فى غضب) اخرسى !

زيمات : (فى هذيان) شفتك ساعتها بتبصى له، يوميهها مانتيش

وقعدتى تحلمى وتكلمى عنه، فأكرة

نفرتي : إنت مجنونة؟!

زيمات : (مبتعدة عنها في غير ثبات) تانى يوم الملكة تاى اختارتك
 لابنها المريض البشع ، اللي رضىتى بيه ، ونسيتى فتى
 الأحلام ، جوزى عارفة ليه . . . عشان إنتى ملكة الواقع . .
 إنتى . . .
نفرتيتى : (تقاطعها صارخة) اخرسى ، اخرسى

(وقفة)

إنت مش فى عقلك !

(صمت)

زيمات : أنا سكرانة . . . واللى أنا بقوله ده كلام . . . أنا بس
 بعاكسك ، (ضاحكة فى تشنج) ياما قلنا أنا وإنتى أكثر من
 كده قبل ما تتجوزى الأمير وأنجوز أنا حور محب .
نفرتيتى : (تقاطعها فى سرعة) أنا جايه ليكى هنا لأننى مشفتكىش من
 زمان .
زيمات : (تتمتم) أنا ليه الشرف يا نفرتيتى ، أنا بس كنت بعاكسك ياما
 قلنا أنا وإنتى كلام أكثر من كده بكثير لما كنا صغيرين .
نفرتيتى : الوضع دلوقتى مختلف .
زيمات : صحيح . . . الوضع مختلف ، إنت دلوقتى الملكة !

(وقفة)

- نفرتي : إيه اللي جراك يا زيمات؟ افكرت إنك ها تبقى سعيدة لما تشوفيني .
- زيمات : طبعا . . . طبعا . (تشرّب) أنا فعلا سعيدة .
- نفرتي : إنت أختي ، ودائما هكون جانبك لما تحتاجيني ، وأنا متأكدة إنك برضه تكوني جانبي لما أحتاجك .

(صمت)

- طبعا هتضري حفل التتويج . هنروح سوا .
- زيمات : طبعا .
- نفرتي : فيه بعض المشاكل ، بس ربنا معانا ، ومش هيتخلا عننا .
- زيمات : (تشرّب) طبعا ، فيه مشاكل ، والإشاعات في كل مكان ، وده غضب من آمون وكل الآلهة .
- نفرتي : كلامك زى كلام الكهنة الملاعين .

(وقفة)

- زيمات : (ضاحكة في هيسيريا) أنا مش غيبة يا نفرتي !
- نفرتي : قصدك إيه؟
- زيمات : إنت عاوزه تقولى إنك بتؤمنى بالدين الجديد والإله الواحد؟ عارفاكى !
- نفرتي : أيوه أنا مؤمنة ومخلصة في إيماني .

زيمات : إنت مؤمنة ومخلصة بس لطموحك اللي مالوش حدود .
وانت عارفة ده كويس .

نفرتي : (تقف ، فى غضب) أنا مخلصة وصادقة .

زيمات : اتكلمى عن أى حاجة غير الصدق إنت مش ممكن تكونى
صادقة . ده عيبك اللي مالوش حل !

نفرتي : مبتعرفيش تخبى حقدك .

زيمات : لا مش حقد ، أنا بس بقول الحقيقة ، لأنى أكره الكذب ،

إنت متقدرش تكونى صادقة ، وعشان طموحك تعمل أى
حاجة تغيرى دينك . . . تكذبى حتى على نفسك وتقولى
إنك بتحبنى جوزك المريض البشع . حياتك كلها كدبة
كبيرة

(فى تهكم) تقدرى تواجهى نفسك وتقولى لها (توقف فى
جنون) وتقولى لجوزك إنك عاوزاه واجوزتيه عشان
العرش؟

(وقفه) تقدرى تقولى له إن حور محب كان ويمكن لسه
فارس أحلامك؟!

نفرتي : (مصدومة ، تخطو ناحيتها وتمسك بذراعيها فى عنف)
عمرك ما هتغيرى ، نفس الشر الأسود . . .

(صمت)

(تتجه ناحية الباب ، وعيناها تنبى عن تيقظ عنيف فى روحها)

إلا أنها تحاول أن تبدو متماسكة وهي تخرج في مرارة
والم...
ياه... عمري ما تخيلت إنك شايلة كل الحق والكراهية
دول ليه!

إسلام

(نهاية الفصل الأول)

الفصل الثانى

المشهد الأول

(الوقت ليل متأخر ، وفى أحد الأزقة الفقيرة فى قرية على الجانب الآخر من النيل ، إختاتون فى ملابسه العادية ، يصغى إلى صراخ وبكاء أطفال يأتى من بيت قديم معزول ، يبدو أن بيك غير مرتاح لوجوده فى مثل هذا المكان ، إلا أنه لا يظهر ذلك)

بيك : مولاي ، أنا مش فاهم أقصد مش شايف النظرية فى وجودنا . . (يتردد ، ناظر احواليه) يعنى يا مولاي ناخذ مركب فى الليل ده ونيجى لحنة مقطوعة ، باين عليها الغلب والفقر و . . .

إختاتون : (مقاطعا) هس ، إنت سمعت ده؟

- بيك : إيه؟
 إخناتون : ده؟
 بيك : ده إيه يا مولاي؟
 إخناتون : حد بيبيكي!
 بيك : (يصغى، فى غير اكتر اثار) عيال بتبكي قبل النوم...
 مش بالطريقة دى!
 (فى ارتباك) مش فاهم، عيال!...
 عيال بتبكي عشان هم عيال، أقصد إنه عادى
 وبعدين...
 إخناتون : (متجها ناحية المنزل مصدر الصوت) لا. لا.
 (يدق على باب المنزل، تظهر امرأة عجوز واهنة البنيان)
 فى إيه يا أمى؟
 المرأة العجوز : مفيش حاجة.
 إخناتون : عيالك بيكوا... ليه؟
 المرأة : (بعد تردد) جعائين!
 إخناتون : جعائين! ليه مبتأكلهمش؟!

(وقفه)

- المرأة : معندناش أكل.
 إخناتون : (مصدوما، يخطو إلى الداخل) معندكيش أكل! (ينظر
 أمامه فيجد طفلتين صغيرتين فى ملابس بالية، تبكيان

وبجوارهما وعاء من الفخار على النار يتصاعد منه
البخار)

إنت بتطبخنى أهه ؟ (يرفع غطاء الوعاء، فى شك)
بتطبخنى إيه ؟ !

المرأة : (فى عجز يائس) شوية أحجار !

إخנתون : (مصدوماً على نحو بالغ) أحجار ؟ !

المرأة : لغاية ما يناموا .

(تحاول أن تسيطر على دموعها) معنديش حاجة أطبخها لهم .

(صمت)

(ينظر إخنتون إلى الوعاء ثم إلى الطفلتين، ويندفع
بعدها إلى الخارج، وخلفه بيك، تبدو على وجه المرأة
الدهشة، ولكنها تتحرك فى حزن إلى الطفلتين اللتين
يتصاعد بكاؤهما، تحاول تهدتتهما وهى تغطيهما)
خلاص يا حبايى . . . خلاص . . . ربنا كريم . . . ربنا
مش هايسينا . . .

(على نحو غامض تستجيب صرخات الطفلتين لعجز
ويأس المرأة، فتخفت الصرخات وتصبح همهمات
ضعيفة حزينة)

(يعم المسرح إظلام كامل ويأتى صوت الناي حزينا
وحيدا موحشا)

(يدخل إخناتون يهرول عائدا وهو يحمل فوق كتفيه كيسين من الحبوب والطعام - متجها ناحية المنزل يتبعه بيك)

بيك : خلينى أشيل عنك يا مولاي .

إخناتون : لا هايسألنى أنا، مش إنت .

بيك : مين اللى هيسألك يا مولاي ؟!

إخناتون : ربنا . . ربنا هيسألنى عن الفقراء والمساكين . (وهو

يخطر داخل المنزل) دول مستوليتى . (يضع الحبوب

والطعام، إلى المرأة محاولا الابتسام)

ده ليكى إنتى والبتين . (وقفة) دول بناتك؟

المرأة : بنات ابنى .

إخناتون : وفين ابنك؟

المرأة : مات فى الحرب، مراته سابت البيت والبنات ليه .

(وقفة)

إخناتون : (كمن قرر شيئا) عاوزه حاجة تانية يا أمى ؟

المرأة : ربنا يخليك يا ابنى .

(يتجه نحو الباب للخروج) يا ريت يا ابنى

(يلتفت إليها)

يا ريت كان اللى بيعكمونا زيك!

(يفاجأ إخناتون، لكنه يلتفت متجها إلى الخارج)

(خارج المنزل يقف إخناتون متأملا فى أسى)

إخاناتون

: (إلى بيك) طب والناس الثانية؟

(بيك لا يعرف ما يقوله)

فيه ناس كثير زى الست دى منعرفش عنهم حاجة وربنا
هيسألنى عنهم، آلاف كثير زى الست دى، أيوه ناس
كثير فى مصر مش لاقين ياكلو بيموتوا من الجوع
والكهنة وأتباعهم الفاسدين أخذوا كل حاجة !

(وقفة)

(فى مرارة) وكان كل همه يشن الحروب ببنى الهرم
ونماثيل كبيرة ملهاش معنى ! (ملتفتا إلى بيك) فين الفن
بتاعك من الحقيقة اللى شفتها الليلة دى يا بيك ؟
(وقفة) ضيعت وقتك وموهبتك فى رسم زيف ملوش
معنى ! ليه ؟ ليه ؟ !

إظلام

المشهد الثاني

قصر إخناتون ، نفس القاعة ، تدخل الملكة الأم تاي ،
ونفرتيتي .

- تاي : (في نفاد صبر) ده مش وقت إجابات غامضة .
نفرتيتي : (مرتبكة ، ما زالت نظرة التيقظ تسكن عينيها) مش عارفة ،
(لنفسها تقريبا) هي زيمات دايما كده .
تاي : أنا ما بتكلمش عن زيمات ، باتكلم عن جوزها حور محب ،
مع مين هو ؟
نفرتيتي : الأمير طبعاً .
تاي : عرفتني مين ؟ قصدى إزاي قالت لك ده ، واللا سمعتيها من
حور محب نفسه ؟

نفرتيتي : ماكانش موجود، (وهي تفكر) كلام... كلام زيمات

بيقول كده. (وقفة) أمى الملكة (تتردد) حضرتك مصدقة

ابنك؟ قصدى بتؤمنى بالله الواحد؟

تاى : (متحاشية النظر إليها، تسير إلى الأريكة) أنا تعبت،

وأيامى قليلة.

نفرتيتي : (فى استجداء) حضرتك بتؤمنى بالله الواحد الذى لا إله

إلا هو؟

تاى : (تجلس) أيوه.

نفرتيتي : لكن ماقلتيش أبدا لابنك!

تاى : إنتى وابنى لسه أطفال، معرفتكم بسيطة بالعالم

وحقيقته، أنا بكره الكهنة الخبثا، وعارفة إنهم أعداءنا رغم

إنهم بيتظاهروا إنهم أصدقاءنا، قوتهم وثروتهم زادت

قوى بمرور السنين، أصبح كاهنهم الأعظم فرعون تانى،

ورغم الظاهر إنهم بتوع عبادة، الحقيقة إنهم وحوش،

استفحلت، نهبت وسيطرت على كل حاجة فى البلد،

لكن دى حقيقة... وحقيقة مرة مصر عايشاها من مئات

السنين، وبقالنا سبعة وتلاتين سنة بتعامل معاهم بدهاء

وحكمة، وده اللي عاوزاكي إنت وابنى تتعلموه.

(وقفة)

المواجهة الصريحة معاهم كارثة!

نفریتی : مش كان أحسن ابنك يعرف إنك بتأيديه ومؤمنة بالله
الواحد زيه؟

(مدركة ما تأثيره كلماتها من ألم) إختاتون واقف وحده!
تای : لا . ده مش التأيد اللي يحتاجه ، لا بد يعرف إن اللي بيصنع
فرعون ويهدمه هم الكهنة!

(صمت)

وأنا عاوزاكي تساعدني إنه يفهم الحقيقة دي!
نفریتی : (تبدأ في اكتشاف ما تريده وتؤمن به حقيقة) مقدرش .
تای : (تقف) لا . تقدرى يا بنتى!
(تخطو ناحيتها) حاولى تاخدى فكره بعيد عن فكرة الإله
الواحد .
نفریتی : ده حقيقة عايشها ومحدث يقدر يغيره .

(وقفة)

تای : تحبى تشوفى جوزك بيدمر نفسه؟
نفریتی : لا طبعا
تای : إذن اعملى كل اللي تقدرى عليه عشان تحمى جوزك
والعرش يا نفریتی ، إنت الملكة دلوقتى أنا حاربت كتير
عشان جوزى والعرش ، بس تعبت وعجزت ومعادش فيّ

حبل ولا صحة . (تتجه للخروج) أنا ليّـه الراحة
دلوقتـي .

(تخرج)

نفرتي : (في بأس - لنفسها) أنا مقدرش أكون زيك يا أمي ، مافيش
حاجة أقدر أعملها ، إختانون لوحده بيواجه العالم ومش
عارفة أقف جنبه إزاي .

(وقفة)

أحتي بتحسدني يمكن أنا زي ما بتقول مش صادقة
وده العقاب ؟ لا أنا صادقة . . . ومؤمنة بربك يا
إختانون ، إنت بتقول ربنا يعرف اللي في قلوبنا ، وأنا
صادقة وربنا عارف . . .

(تأتي موسيقى عذبة مصحوبة بتراتيل جماعية من داخل
القصر ، نفرتي تصغى في تأثر إلى كلمات التراتيل : يا
رب الجميل يا جميل يا رب في حبك بتعيش القلوب ،
وتعنى الطيور ، نورك جوايا وماليش غيرك يا رب !
(وهي تسجد) نورك جوايا وماليش غيرك يا رب .

(باكية) نور جوايا يا رب ، يا رب إنت عارف إني صادقة !
(تضع رأسها بين يديها) ماليش غيرك يا رب ، متسبنش يا

رب، متسببنيش يا رب!
(يدخل إخناتون)
إخناتون : (يلحظها) إنتي هنا لوحدي يا نفرتيتي، أmaal فين أمي؟

(وقفه)

(يقترّب منها) إيه اللي حصل، خير؟!
نفرتيتي : (تحاول أن تخفي دموعها) مافيش حاجة .
إخناتون : (مسكاً بيديها، يأخذها إلى نصف المسرح، في حب)
فيه إيه يا نفرتيتي؟!

(وقفه)

نفرتيتي : (تحاول أن تستجمع شجاعته) أنا عاوزة أقول لك حاجة يا
إخناتون... حاجة يمكن تشوف إنها غريبة خاصة بعد
سنين من جوازنا... لكن... (في حسم) لا بد أن
أقول لها لك .
إخناتون : (مبتسماً) خير .
نفرتيتي : أنا آمنت بالله الواحد قبل ما شفتك .
إخناتون : وكنتي أول امرأة تدخل الدين...
نفرتيتي : (مبتعدة عنه) لو سمحت خليني أقول كل اللي عندي...
أيوه... كل اللي عندي. (وقفه) في يوم من الأيام

سمعت إن أبويا بيرتل التراتيل الجميلة اللى إحنا بنسمعها دلوقتى ، سمعتها وحسيت إنها بتسرى فى روحى ، سألت أبويا معلمك ، عنك وعن ربك ، حكاالى عن عقلك وكماله وعن صدقك ، بعدها لقيت نفسى فى لحظة غريبة بأشهد أن لا إله إلا الله ، الخالق القادر وفى الحفل شفتك لأول مرة ، بالنسبة ليّه كان بيت الفرعون والأمير حلم جميل وأسطورة مشيرة شدتنى ليها زى الفراشة اللى بتشد إلى النور وبعدين (لنفسها تقريبا) وبعدين تتحرق بيه .

(وقفة)

إخنا تون : (فى عاطفة دافئة) نفرتيتى . . . بلاش تبقى قاسية على نفسك .
نفرتيتى : (فى إصرار) أول مرة شفتك اتخضيت ، أقصد ، (تردد) فى البداية حسيت إنك مش ممكن تكون فتى أحلامى .

(صمت)

بعد الجواز بقيت أصلى وأطلب من ربنا يكلمنى زى ما كلمك يقوللى إزاي أحبك ، أمى قالت لى ياما أزواج وزوجات عاشوا بدون حب ، سنين وأنا خايفة إنك فى يوم تسألنى إنت بتحبينى يا نفرتيتى ؟ كنت متأكدة إنى مش هقدر أكذب عليك ، الغريب عمرك ما سألتنى !

إخنتون : إنت كنت أول امرأة تدخل الدين ، وده بالنسبة ليّه أكثر من كفاية يا نفرتيتى .

نفرتيتى : (فى توسل) أنا مبتكلمش عن ربنا يا إخنتون ، أنا باتكلم عنك وعنّى ، إمبارح قلت عاوز تبندى صح وأنا عاوزة إحنا نبندى صح هنا الأول . . . فى بيتنا . . . هل ده ممكن ؟

(وقفه)

إخنتون : ربنا وحده يقدر يغير القلوب يا نفرتيتى .
نفرتيتى : عارف يا إخنتون . . . لما إنت رحلت الجنازة فى طيبة وغبت ، لقيت نفسى بفكر فيك طول الوقت ، مكنتش أعرف إنك عايش جوايا كده . . . وإنت بعيد عرفت إن من غيرك معرفش أكون سعيدة ، كنت عاوزاك ترجع بسرعة ، أنا . . . أنا كنت بشم هدمك فى الدولار ، كنت عاوزاك ترجع عشان أقول لك إن بعادك علمنى إنى مقدرش أعيش من غيرك ، (تطوق بذراعيها عنقه) وإنى بحبك يا إخنتون .

إخنتون : أنا كمان بحبك يا نفرتيتى . (وقفه) الحمد لله .
(يتحرك بعيدا لكن فى هدوء) نفرتيتى أنا كنت عارف كل اللى قلتيه ده ، لما اتقابلنا أول مرة فى الحفلة ، شفت عينيكى وحيرتك ، أنا عارف نفسى كويس يا نفرتيتى ، أنا لا منظر ولا وسيم زى حور محب مثلاً . . .

نفرتي : (تأتى له ثانية، فى عاطفة مشبوبة) لا يا إخناتون إنت
حبيبي، عيني وقلبي مشوفوش غيرك وربنا عارف . . .
ربنا عارف .

وسامحنى ماكتتش أعرف إنك كنت عايش وبتفكر فى
حاجات زى كده، ورغم كده عمرك ما قلت كلمة تجرح
شعورى!

إخناتون : مقدرش يا نفرتي، ولا هقدر، لإنك هدية ربنا الحلوة
ليه .

(تركع وتقبل يديه) بحبك . . . وبحب ربك يا إخناتون!

نفرتي : (ياخذ يديها فى يديه، ويقودها إلى منتصف المسرح)

إخناتون : بحبك يا نفرتي .

(يحتضان فى عاطفة عميقة مشبوبة)

نفرتي : من النهارده مش هتبعد عني ولا هبعد عنك، عاوزه أبقي

زى أمي الملكة اللي وقفت مع جوزها فى كل حاجة، ويا

ريت يا إخناتون تشركني معاك فى كل شىء .

إخناتون : (يبتسم ناظراً ناحية الباب حيث تأتي أصوات) (يدخل

ماهو)

أيه يا ماهو؟

ماهو : ميروراهنا يا مولاني .

إخناتون : خليه يدخل (ما زال يبتسم إلى نفرتي) عاوزه تشتغلي

معايا؟

(ياخذ بيديها ويقعدها على الأريكة) اتفضلي، دى البداية،

اقعدى جنبى هنا، إنت اللي طلبتي!

(يدخل ميرورا، وينحنى)
(إلى ميرورا) أهلا ميرورا. إنت عارف بعث لك ليه؟
ميرورا : لا يا مولاي.

(وقفة)

إخنتون : (يقف ويتبعد عن الأريكة) عاوز مساعدتك .
ميرورا : أنا خادم مولاي .
إخنتون : عندى لك وظيفة هنا، لكن الأول فيه أخبار كويسة !
(وقفة) الهرم اللى ضيعنا فلوس البلد عليه ومخلصش
خلاص، مفيش هرم، كل العمال يرجعوا بيوتهم
وغيطانهم، من النهارده مفيش أهرامات ولا حروب . . .
(يلاحظ السعادة والمفاجأة على وجه ميرورا) بخصوص
عملك الجديد . . . إنت سمعتك كويسه، أمين وبخاف
ربنا (ينظر إلى نفرتيتى التى تبسم موافقة) . . . عاوزك يا
ميرورا تصلح حاجات كتيره هنا فى القصر وعلاقته
بالناس .

(وقفة)

أنا اخترتك يا ميرورا كبير الوزراء وأمين على القصر .
ميرورا : أنا أخدم مولاي ووطنى فى أى مكان . (فى حرص) وطبعاً

عملى هيكون مع ماهو رئيس الحرس ، وتوتو رئيس الأمن . . .

إخناتون : اسمعنى يا ميرورا كويس إنت هتبقى مسئول عن كل حاجة فى القصر والبلد ، أنا عاوز أعرف كل شىء ، عاوز تقارير صادقه ، مش عاوز كذب وافتراءات على الناس ، عاوز كل مصرى يشعر إنى قريب منه وحاسس بيه وبمشاكله .

ميرورا : (ينحنى) أدعو الله أن يوفقنى وأكون عند حسن ظن مولائى .

إخناتون : إذن استعد من الآن ، متجيبش سيرة وتبدأ بعد التتويج مباشرة .

(ميرورا ينحنى ويخرج)

(وقفة)

نفرتى : أنا خايفه يا إخناتون .

إخناتون : من إيه؟

نفرتى : كهنة آمون والآلهة الثانية و . . . (تتوقف)

إخناتون : (بهدهوء) إحنا ربنا معانا .

نفرتى : قصدى إحنا ممكن نأجل إعلان الدين الجديد ، نخليه بعد

التتويج ، أنا سمعت إن الفرعون الجديد لابد أن يتوجّه

كهنة آمون والآلهة الثانية .

إخناتون : مش محتاجهم ، التتويج هيحصل فى عز النهار ، قدام

المعبد فى الشارع بين الناس البسطا وربنا شاهد وبيارك .

(صمت)

(يمسك بيديها ليقودها إلى منتصف المسرح ، تختفى إضاءة المسرح إلا من بقعة تغطيها وخاصة وجهيهما والسعادة الحقيقية التي تغمرهما ، تبدو نفرتيتي مسحورة بصدق وعفوية كلمات إخناتون الذي أسره هو الآخر حب نفرتيتي الصادق له وخوفها عليه البادى بجلاء على وجهها الجميل)
(تأتى من على البعد موسيقى التراتيل العذبة)
بحب وشك ، حلو قوى .

(وقفه)

ماتخافيش يا نفرتيتي أنا عارف التغيير كبير ومش سهل ، لكن ده أمر ربى ، والتغيير ده لصالح شعب مصر اللى استعبده الكهنة وأتباعهم آلاف السنين ، الكهنة صنعوا من الفرعون إله عشان مصالحهم ، وهم كمان أصبحوا فراعنة ، والبلد كلها أصبحت فراعنة وعبيد عايشة وناس مش لاقية تاكل . (فى حسم) لا بد من التغيير ، لا بد واحد يقف ويقول لا ، أنا الواحد ده ، ربنا اختارنى (فى صوت متهدج صادق) مفيش آلهة على الأرض يا نفرتيتي ، وهدأ بنفسى وأكون الفرعون الأخير ، هعيش زى كل المصريين العاديين ، ألبس وأكل وأشرب زيهم ، ده اللى عاوزه ربنا منى . (وقفه)

عندنا شغل كثير بعد التتويج ، هنبنى كل شىء من جديد ،

مفيش ظلم ولا فساد، المصريين هيعيشوا الحياة الكريمة اللي
يستحقوها، ياما شفتهم بيعانوا والقصر بيحتفل بأكاذيب!

نفرتيتى : غريبة !

إخنا تون : إيه؟

نفرتيتى : عمرك ما حببت حياة القصر فى طيبة، ودايما تحب الوحدة؟

إخنا تون : عمرى ما حسيت إنى منهم . . . أنا (يتوقف)

نفرتيتى : (فى إصرار) إيه؟!

(وقفة)

إخنا تون : (يتحرك بعيدا عنها للخروج) أنا . . . مش عاوز أتكلم . . .

نفرتيتى : (تتابعه فى إصرار) عشان خاطرى قول لى، (مش عاوزاك

تكون لوحدك تانى أبدا.

إخنا تون : اتعودت خلاص على الوحدة !

نفرتيتى : ضرورى فيه سبب .

(صمت)

إخنا تون : فيه بداية يمكن نقولى عليها سبب، من ستين أجبرنى أبويا

الملك أطلع معاه ومع أخويا تحتشمس نصطاد فرس البحر،

اللى هاج ووقعنا كلنا فى الميه، مقدرتش أعوم ولقيت

نفسى بغرقى وكنت بموت، وصرخت . . . ناديت ربنا

وسمعه يقول ليّ إنت هتعيش عشان تعبدنى ، معرفش
لقيت نفسى إزاي على الشط . . . وعرفت إن أخويا مات
فى نفس المعركة مع فرس البحر ، (فى مرارة شديدة) الموج
كان عالى وشديد ، الملك ماشافش وهو بيضرب فرس
البحر ، أصاب ابنه ، أخويا تحتمس .

عمرى ما هنسى اليوم ده محدش كلم حد لغاية ما وصلنا
القصر وفوجئت بالملك أبويا بيقول أغرب حاجة !

نفرتيتى : قال إيه ؟

(وقفه)

إخناتون : قال ياريتك مت وأخوك هو اللى عاش !
(صمت) فى اليوم ده إحساس غريب وصلنى . . . حسيت
إن مش بس أخويا مات ، لكن كمان أبويا وأمى ضاعوا
منى ، . . أيوه كلهم ضاعوا منى ، والدنيا معدتش هى
الدنيا ، بعدها اتعلمت ألاقى نفسى فى وحدتى !

إسلام

المشهد الثالث

(متصف الليل ، فى كهف بجبل قرب مدينة تل
العمارة ، يقف الكاهن الأعظم فى الوسط مستغرقا
فى أفكاره ، بينما الكاهنان الثانى والثالث وتوتو
ينتظرون فى توتر أن ينتهى الكاهن الأعظم من
تفكيره ويتكلم)

الكاهن الأعظم : (ملتفتا إلى توتو ، فى تهكم) إذن غدا يتم تتويجه بين
الناس مباركا من إلهه؟!

توتو : نعم يا سيدى .

الكاهن الأعظم : أين؟

توتو : فى الساحة اللى أمام المعبد .

الكاهن الأعظم : متى؟

توتو : فى منتصف النهار .

(وقفه) الملكة تاي واتنين من كبار المواطنين هيلبسوه
التاج .

الكاهن الثالث : الملكة تاي داهية ويحبها الناس ، وأخشى أن هذا
يدمر كل شىء .

الكاهن الأعظم : (يذرع المكان جيئة وذهابا- إلى توتو)

وهل ما زال ينوى إعلان الدين الجديد

توتو : وأيضاً إلغاء كل الديانات الأخرى!

(صمت)

الكاهن الأعظم : (يتوقف فى هدوء وثقة) ونحن مستعدون .

(إلى الجميع) لا نوم لنا الليلة . (وقفه) لا يجب أن

نسمح لحور محب أو وماهو بحضور الاحتفال . أنا

سأتولى حور محب . (إلى توتو) وأنت تتولى الملكة

تاي وماهو ، لا يجب أن يحضروا الاحتفال .

توتو : أمرك يا سيدى .

(وقفه) وماذا نفعل مع ميرورا؟

الكاهن الأعظم : (مبتسما فى تحد) غريمك؟!

توتو : أرسل له أمس .

الكاهن الأعظم : لماذا؟

توتو : لا أعرف ، لم يرسلنى إليه بل كلف ماهو بذلك .

الكاهن الأعظم : وهل قابله ؟

توتو : نعم ، لكن لم يعلن شيئاً بعد اللقاء ، ميرورا ربما يُعين كبير الوزراء !

الكاهن الأعظم : أو ربما رئيس الأمن الجديد ، أنت قلت له إنه أرسل ماهو ولم يكلفك أنت !

توتو : (فى قلق بالغ) ربما !

الكاهن الأعظم : (وقفه) أعدك يا صديقى لن يكون هذا أو ذاك ، (إلى الجميع) والآن اصغوا جيذا يا أصدقائى ، أمامنا غدا خياران لا ثالث لهما : إما أن نخرج من هذا التحدى أو نخسر كل شىء وغوت جبناء ، الخطأ غير مسموح به .

(وقفه)

(إلى الكاهن الثالث) غدا ، وقبل ظهور الكافر بدقائق قليلة ، يتواجد عشرون من رجالك فى الصف الأول وينتظرون إشارتك أيضا يجب أن تحسن توزيع بعض الرجال بين الجمهور للسيطرة عليهم .

(وقفه)

(إلى توتو) عليك أن تستبدل بثلاثة من رجالنا من
حراس العرض ، هؤلاء الرجال يجب أن يلاصقوا
الكافر طوال العرض .

(إلى الجميع) والباقي تعرفونه !
(يدخل الكاهن الأول ، ويبدو متزعجاً)

الكاهن الأول : لقد اختفى الشاب !

الكاهن الأعظم : متى ؟

الكاهن الأول : اكتشف الحارس ذلك منذ دقائق .

الكاهن الأعظم : (وقفه) لا بد أن تجدوه . (إلى توتو) لا يجب أن

يتمكن من الوصول للقصر . (للجميع) لا بد من
القبض عليه .

الكاهن الثاني : وماذا نفعل به عندما نجده ؟

(وقفه)

الكاهن الأعظم : اقتلوه !

(وقفه)

قلت لكم الخطأ غير مسموح به ، خطأ واحد يعنى
موتنا جميعاً

(يهرع الكاهنان الأول والثاني إلى الخارج)

(صمت)

(إلى توتو) سيحاول هذا الشاب الوصول إلى
القصر، لذا من الأفضل أن تكون في انتظاره هناك!
(يخرج توتو)
(إلى الكاهن الثالث) أما أنا فساذهب لأرى حور
محب.

الكاهن الثالث : نحن الآن في منتصف الليل يا سيدي!
الكاهن الأعظم : حور محب صديق قديم، وأعرف جيدا كيف ألاعبه.
الكاهن الثالث : هل أذهب معك؟
الكاهن الأعظم : لا. ابق هنا.
(يغطي نفسه تماما بالعباءة) تراقب كل شيء (وهو
يغادر) لا نوم لنا حتى نقضى على هذا الكافر!

إسلام

المشهد الرابع

(توتو وحده فى أحد غرف القصر، يذرع المكان جيئة
وذهابا فى قلق وتوتر بالغين)
(يدخل الحارس مندفعاً)

الحارس : قبضنا عليه يا سيدى .

توتو : مين اللى قبضتم عليه؟

الحارس : الشاب كان يبحوم حوالين القصر . عاوز يقابل الأمير !

توتو : ما تكلمش عن حاجة؟ أقصد قال عاوز يقابله ليه؟

الحارس : لاهو مصمم إن الأمير يسمع بنفسه .

توتو : هاته .

(يندفع الحارس خارجاً)

(لنفسه) عاوز يقابل الأمير !

(وقفة)

(يدخل الحارس دافعا الشاب أمامه)

توتو : (إلى الشاب) إنت عاوز تقابل الأمير؟

الشاب : أيوه

توتو : عشان إيه؟

الشاب : مسألة حياة أو موت .

توتو : (يخطو في اتجاهه) بجد؟ فيه إيه؟

الشاب : الأمير لا بد يسمعها بنفسه .

(وقفة)

توتو : (في لهجة حادة غاضبة) إنت تعرفنى ؟

الشاب : لا يا سيدى .

توتو : أنا رئيس الأمن ، تعرف ده معناه إيه؟ معناه إنه إذا كانت

المسألة حياة أو موت فأنا أول من يعرف . إنت فاهم الكلام ده؟

الشاب : فاهم يا سيدى ، بس آسف ، أنا هقول اللى عندى للأمير .

(صمت)

توتو : إنت مش فاهم حاجة ، (وقفة) اسمعنى كويس .
 إنت فاكرو إن إحنا مانعرفش اللي عندك ؟ عارفينه طبعا ،
 (وقفة - متأملا تأثير كلماته على وجه الشاب) كل المصريين
 بيعحبوا الأمير ، لكن كل واحد فى الدنيا له أعداء ، وفيه قلة
 حاقدة مجنونة ممكن تتآمر على أميرنا المحبوب . . . (ناظرا
 فى عينيه بحدة) إحنا عارفين كل حاجة .
الشاب : (مرتبكا) لكن فيه موضوع تانى خطير .
توتو : (بسرعة) إيه ؟
الشاب : (يتردد ناظرا إلى الحارس) مقدرش و . . . يعنى . . .

(يتوقف)

توتو : (يشير إلى الحارس فيخرج) تقدر تتكلم دلوقتى .
الشاب : (يقترّب كثيرا منه هامسا) أنا سمعت إن المتآمرين لهم الراجل
 بتاعهم فى القصر ، ما قالوش اسمه لكن بيقلولوا هو قريب
 قوى من الأمير وإنه . . .
توتو : (فى صوت مسرحى عنيف) إنت مجنون ؟!
 عاوز تقول ليّه أنا مغفل معرفش حاجة عن اللي بيحجروا حواليا .
 هنا فى القصر ؟!
 (صارخا) حرس . . . حرس !
 (يندفع حارسان إلى المسرح)
 (إلى الشاب) إزاي تجرؤ وتتهم واحد من رجالتى بالخيانة ؟

رجالتى كلهم يفدوا الأمير والوطن بروحهم !
إزاي يجرو لسانك ويقول الكلام ده؟!
لسانك لا بد إن يُعاقب اقطعوا لسانه !
(يتحرك الحارسان بسرعة فى اتجاه الشاب الذى تصيبه
الصدمة بفزع شديد، فيحاول المقاومة، لكن الحارسين
يتمكانان فى النهاية من قطع لسانه وتصدر عن الشاب صرخة
ألم ورعب طويلة)

إظلام

المشهد الخامس

(منزل حور محب . نفس الغرفة ، بعد منتصف الليل ، تقف زيمات عند النافذة ، وفى يدها كأس تحتسى منه الخمر ، بينما يجلس حور محب على الأريكة ويبدو مهموما حانقا)

حور محب : (متهكما) السلام والحب؟! ... الجمال والصدق؟! ... سلام ... حب ... (فى صوت عال إلى زيمات) جده العظيم أمنحوتب الثانى مرة قبضَ على سبع حكام من الولايات المتمردة اللى فى الشام دبحهم كلهم وحط ستة منهم على مركب للناس تتفرج عليهم من الشام لغاية طيبة ، السابع

علقه على شجرة التوبة علشان يردع كل المتمردين ،
هو ده اللي عمل الإمبراطورية المصرية ، وهو ده اللي
أبقى عليها عظيمة وكبيرة !

(وقفه)

دلوقتي إختاتون مفيش على لسانه غير السلام
والحب ، كنت فاكرك هيبتردى زى جدوده ويلقن
المتمردين إزاي يتعاملوا معانا ، أنا قلت له لا بد نبعت
قواتنا فى الحال !

زيمات : (تلثفت إليه فى حدة) اصح يا حور محب ، الأمير
عمره ما بيعت قوات ، اصح !

حور محب : قصدك إيه ؟ !

زيمات : مش هيبعت قوات ولا هيسمح لك تقود قوات أبداً !

حور محب : (مصدوما) ليه ؟

زيمات : حور محب . . . جوزى . . . المحارب العظيم طفل
برىء !

حور محب : (غاضبا) ليه ؟ فيه إيه ؟

(وقفه)

زيمات : أميرك سيتوج غدا، سيصبح فرعون مصر العظيم،
لكنه يعرف إنك بطل فى قلوب وعقول المصريين،
إرسال قوات تقودها إنت هيعلى صورتك فى عيون
المصريين، عشان كده عمره ما هيبعت قوات، وعمره
ما هيقول لك ليه ومش هتاخذ منه إلا كلامه الفارغ
عن السلام والحب!

حور محب : (يقف) لا. لا. إختاتون مش كده. إنت ما
تعرفيهوش.

زيمات : عارفاه... ضعيف خبيث، وكلامه عن السلام
والحب مجرد كلام بيدارى بيه ضعفه وغيرته منك!

حور محب : (لا يريد أن يصدق، يتحرك ناحيتها) إنت مش فاهماه
هو طول عمره كده دايما بيتكلم عن السلام والحب.
(لا يجد نفسه قادرا على قولها) ومش ممكن يكون
بيغير منى!

زيمات : (فى إصرار) لا يغير منك!

حور محب : لا. لا. مش ممكن. (مبتعدة عنها) إنت ما
تعرفيهوش.

زيمات : فوق يا حور محب، اصح قبل ما يضيع كل شىء.

حور محب : (يعود إليها، فى ضيق وعصبية) قلت لك إنت
ماتعرفيهوش. (ياخذ منها الكأس) إنت شربتى كثير.
(يضع الكأس على الطاولة ويبدو مهموما وروحه

مضطربة) أنا تعبـان . (يطفى كل الشموع ما عدا
واحدة ويتحرك ناحية الباب) عاوز أناام .
(تسمع دقات على الباب)
(ملتفتا) فيه إيه يا ناى ؟
(تدخل الخادمة)

ناى : فيه واحد عاوز يقابلك يا سيدى .
حور محب : فى ساعة متأخرة زى دى ، مين هو ؟ !
ناى : مش عاوز يقول يا سيدى ، بيقول إنه صديق !
حور محب : (فى دهشة) صديق !

(وقفة)

(إلى زيمات) ادخلى جوه دلوقتى . (إلى الخادمة)
دخليه .

(يدخل الكاهن الأعظم ، يخلع عباءته ، ويقف عند
الباب)

حور محب : (يتحرك ناحيته مندهشا) سيدى الكاهن الأعظم !
(ينحنى ويقبل يده) ظننت إنكم فى طيبة !
الكاهن الأعظم : تركت طيبة منذ أيام قليلة ، كان لا بد من ذلك ، لا
أحد يعرف أنى هنا . (وقفة - فى تهكم) تعرف أننى
لست مدعوا !

حور محب : هذا أمر يؤسف له يا سيدى ، ولا أستطيع أن أفعل شيئا ، ولا يعنى ذلك أننى ناكرا للجميل ، فأنا لم أنس أبدا ما فعلته من أجلى ، اخترتنى من دون الجميع لتخصنى برعايتك من البداية ، (فى خجل) لكن صدقنى يا سيدى . . .

الكاهن الأعظم : (فى جلال ووقار) أعرف يا بنى أن القلب الشجاع النبيل لا ينسى الأفضال ، وأن صاحب الطبيعة الحسيسة وحده هو الذى يخجل من ذكر هذه الأفضال ويحاول نسيانها ، ولا أعتقد أننى ظننت ولو للحظة أنك قد نسيت الأيام القديمة .

حور محب : (ما زال فى خجل) بالطبع يا سيدى .
الكاهن الأعظم : جئت هنا متخفيا لا لكى أطلب منك خدمة .

(وقفة)

(يخطو ناحيته) جئت هنا لكى أشكرك .

حور محب : (أكثر خجلا) تشكرنى! على ماذا؟!
الكاهن الأعظم : الناس يتكلمون عنك وكيف واجهت الأمير فى شجاعة طالبا منه إرسال قوات لنجدة إخواننا فى الشام ، يتحدثون عن عزمك ألا تحضر حفل التتويج ، لأنك غير راض عما فعله بنا والقرارات التى يعتزم إعلانها غدا .

حور محب : (مرتبكا) طبعاً أنا طلبت منه إرسال القوات لكن ،

بأمانة . . . أنا لا أعرف شيئا عن مسألة عدم حضوري
حفل التتويج !

الكاهن الأعظم : ربما يريد منك الناس ألا تحضر ، فأنت أصبحت
بطلهم ، ويتوقعون منك أن تفعل ما لا يستطيعون ،
وهذا ما يمثل البطل للناس !

حور محب : (مبتعدا عنه) سيدي . . . لا أعرف كيف أقول لك
. . . (يتردد) سيدي . . . (يتردد) أنا لست هذا
الشخص المتدين الذي . . .

الكاهن الأعظم : (مقاطعا) لكنك رجل الوفاء والالتزام ، وهذا ما يحبه
المصريون فيك ، يحبون فيك القلب الشجاع النبيل
الذي لا يقبل إلا الإخلاص لأصدقائك القدامى .

(وقفه)

اسمع يا بنى ، لقد دمرت معابدنا ، ونهبت ثرواتنا ،
ولكننى لست هنا للشكوى ، فنحن لم نهزم بعد ،
وبعون الآلهة لن نهزم ، أنا هنا يا بنى لأننى كما كنت
دائما وما زلت مهتم بنجاحك فى عملك .

حور محب : لا أفهم .

الكاهن الأعظم : عدم حضورك التتويج قد لا يكون له أهمية أو قد
يكون له بعض الأهمية بالنسبة للأمير ، لكنه يعنى
الكثير بالنسبة للناس .

حور محب : كيف؟

الكاهن الأعظم : لأنك بطلهم الشجاع الرزين . (وقفة، يخطو ناحيته، يتوقف ناظرا فى عينيه) لا يجب أن يكون مرتبة قائد الجيوش هى نهاية مطاف طموح بطل الشعب . عدم حضورك التتويج لا يعنى شيئا، لكنه بالتأكيد خطوة حاسمة بالنسبة لمستقبلك! (يتحرك فى اتجاه الباب) لا بد أن أذهب الآن (واقفا عند الباب) تذكر أننى جئت لك هنا كصديق قديم، كان دائما مخلصا صادقا معك، (وهو يرتدى العباءة مخفيا وجهه) تصبح على خير .

(يخرج)

حور محب : (فى دهشة - لنفسه) خطوة حاسمة بالنسبة لمستقبلى!

(تعود زيمات)

(إليها) طبعا سمعتى كل شىء!

(وقفة)

زيمات : هتعمل إيه؟

حور محب : مش عارف .

زيمات : (فى سرعة) ليه ؟ طبعاً ماتر حش التتويج .

(وقفه)

حور محب : وهتقولى إيه لـ . . ؟
زيمات : (مقاطعة) قول إني عيانة وموت وماقدرتش تسيبنى !
حور محب : (مرتبكاً ومهموماً يذرع الغرفة جيئةً وذهاباً)
لا . لا .
زيمات : (ذاهبةً إليه) حبيبى حور محب ، البلد بتغلى دلوقتى ،
ومش عارفين أنهى جانب اللى هيكسب ، وعدم
مرواحك نصاحه ، وبعدين إيه يعنى لو مرحتش ، ولا
حاجة ، لا شىء !
(تتبعه ، وتضع يديها على كتفيه فى دلال) ولا حاجة
يا حور محب .
حور محب : إخناتون صديقى .
زيمات : صديقك عمره ما هيخليك تقود الجيوش يا حبيبى ،
لكن إنت هتكون دائماً بطل فى عينين الشعب ، ودائماً
هيحبك طالما الجيش وراك ، عشان كده هو غيران
منك وعاوز يقضى على مستقبلك . . . (تقبل رأسه
من الخلف) اللى هينقذ مصر من اللى بتواجهه دلوقتى
إنت ، أيوه إنت يا حور محب .

(وقفه)

شكلك ملامحك كلها ملامح ملك يا حبيبي !
(يلتفت إليها وعلى وجهه تعبير غريب ، مزيج بين
الإثارة المكتومة والقلق)
أيوه يا حور محب ، كل ما فيك بيقول إنك هتكون
فرعون مصر !

إسلام

المشهد السادس

(قصر إخناتون، نفس الغرفة، الملكة الأم جالسة
على الأريكة ويبدو عليها القلق العميق، تدخل
نفرتي والسرور بادي عليها)

- نفرتي :** (تلاحظ الملكة الأم) صباح الخير أمي الملكة، إنا لابسين
ومستعدين وإننا متأخرة كده !
- تاي :** حاسة إني مش كويسة .
- نفرتي :** (متجهة ناحيتها) خير يا أمي ؟
- تاي :** ماغتشش كويس (لنفسها تقريبا) أحلام وحشة !
- نفرتي :** أبويا كان دائماً يقول أحلامنا هي مخاوفنا ورغباتنا !
- تاي :** صح ، بعض الأحلام رؤى بتقول اللي هيحصل .
- (وقفة)

نفرتيتى : النهاردة تتويج إخناتون، ده عيد ولا بد نكون فرحانين يا أمى . . .

(يدخل إخناتون تبدو عليه السعادة والثقة)

إخناتون : (يقبل أمه) صباح الخير يا أمى . (ملتفتا إلى نفرتيتى) كل شىء جاهز؟ هنتحرك حالا.

تاى : (ناظرة إلى ملابسه فى دهشة) هتروح التويج بالهدوم دى؟!
إخناتون : (مبتسما فى هدوء) أيوه يا أمى .

تاى : الناس هتشوف الملك فرعون مصر لأول مرة فى الهدوم دى؟
إخناتون : مفيهاش حاجة يا أمى، خللى الناس تشوف ملك مصر فى هدوم بسيطة، وعایش حياة بسيطة، خليلهم يعرفوا إنى مجرد إنسان زيهم، وإن كل الناس سواسية .

تاى : (فى حدة) لا . إنت مش زيهم، إنت الملك، فرعون مصر العظيم، لا بد تتزين وتلبس اللي يشير فى الناس الإجلال والرهبة و . . .

إخناتون : (ما زال مبتسما) مش أنا يا أمى . . . مش أنا .

تاى : أنا أعرف الناس، عقولهم بسيطة وساذجة . . . عشان خاطرى يا بنى . . . البس لبس يليق بيك . . . إنت مش زى الناس، إنت حاجة تانية . . . (تصرخ تقريبا) إنت الملك . . . الفرعون العظيم . . .

إخناتون : إله مش إنسان، مش ده اللي عاوزه تقولىه! لا يا أمى، أنا مش إله، أنا إنسان بسيط ضعيف والعظمة لله، الواحد الذى لا إله إلا هو . . .

تاي : (تنهض مقاطعة فى غضب) أنا تعبت . (تتحرك فى اتجاه الباب) عاوزه أرتاح .

نفرتيتى : (تتبعها فى إلحاح) أمى . . . هتحضرى حفل التتويج؟

تاي : (تلثفت ، فى يأس) مظنش هاقدر !

(تخرج)

نفرتيتى : (تعود محاولة الابتسام) النهارده يوم الفرح (تلحظ أمارات الحزن على وجهه) (وقفه)

(متجهة ناحيته) الملكة تعبانة دلوقتى و . . .

(يدخل ماهو)

ماهو : يقول خادمه إن زوجة القائد مريضة للغاية .

(ينحنى ويخرج) (صمت)

نفرتيتى : (لنفسها) لا ، مش مريضة ، دى كدبة ، أنا عارفك كويس يا

زيمات . (تتحول إليه وترى على وجهه ملامح القلق والحزن

تتزايد) لا . لا . يا إختاتون ، مش عاوزاك تكون حزين ، ده

أول يوم شعبك يشوفك (تحضنه) لا ، لا بد يشوفك متفائل

وسعيد .

إختاتون : (يتحرك فى هدوء ناحية منتصف المسرح)

غريبة !

نفرتيتى : إيه؟

إختاتون : (وقفه) أنا كنت عارف !

نفرتيتى : (تبعه) عارف إيه؟
 إخناتون : كنت عارف إن أمى و حور محب مش هيجوا الترويج .
 نفرتيتى : عرفت إزاي ؟
 إخناتون : (فى حيرة) الحلم !
 نفرتيتى : حلم إيه؟
 (من على البعد تأتى موسيقى توحى بالوحدة والخوف ،
 وانبعاث الأمل)
 إخناتون : رؤيا غريبة شفتها بعد الفجر !

(وقفة)

نفرتيتى : (فى قلق واهتمام) شفت إيه يا إخناتون؟
 إخناتون : شفت كيانى فى سفر . . . طريق طويل ، وكنت عاوز أمى
 و حور محب معايا . . . ناديتهم ، وبصيت حواليه . . .
 مالمقتهمش . . . ناديتهم . . . محدش جاوبنى . . . وكان
 لا بد أسافر . . . طريق طويل فى ليل كأنه سجن . . .
 ناديت ربى . . . بعدها شفت نفسى فى مفترق طرق ومش
 عارف أنهى طريق أمشى ! ناديت ربى تانى . . . وتالت ورابع
 . . .
 (تأتى أصوات التراتيل من على البعد) وبعدين فجأة شفت
 أنوار وسمعت تسابيح حلوة جاية من واحد من الطرق . . .

(تكتسب ملامح وجهه غموض محير) . . . مشيت
للنور وشفّت ثلاث وجوه جميلة لثلاث شبان يرحبوا
بى . . . قالوا إنهم ولادى !

نفرتي : ولادك ؟ !

إخنا تون : أيوه ولادى . (وقفه) ماتكلموش لغتنا بس أنا فهمت كل
كلمة قالوها . وكل الكلام اللي قاله أتباعهم اللي خدونى
ليهم ، أيوه . . . أتباعهم خلق كثير كثير ملهاش عدد
بتسبح ووجوها للسما منتظرة تشوفه !

نفرتي : تشوف مين ؟

إخنا تون : (لايسمعها لاستغراقه فى الحلم) بعدين النور ملا الدنيا ،
مقدرتش أبص لفوق . . . النور غطى الأرض والسما
اختفيننا كلنا فى النور . . . أيوه اختفى الخلق فى النور
أصبحنا كلنا هو وسمعت النور يبسبح باسمه . . .
سمعته يبسبح باسمه الله

(يتوقف)

(تختفى التراثيل تدريجيا) (صمت)

نفرتي : الحمد لله النهاية خير !

إخنا تون : (ملتفتا إليها) سمعتك بتنادينى وبتبكي !

نفرتي : (منزعجة) فى الحلم ؟ !

إخنا تون : أيوه لكن مقدرتش أرد عليكى كأن إنتى فى عالم وأنا فى

عالم تانى ! (وقفة) (محاولا أن يرفع من روحها) لما صحيت
كنت سعيد !
(يدخل توتو)

توتو : (ينحنى) العرض يبدأ الآن يا مولاي . والمركبة جاهزة .
إخنا تون : مفيش داعى للمركبة ، (وقفة) قل لميرورا هنروح سوا .
توتو : (ينحنى ثانية) أمر مولاي . (يدخل بيك ومعه تمثال صغير
مغطى)

بيك : (إلى نفرتيتى وهو يكشف عن تمثال لوجه نفرتيتى) ده من
إبداع مولاي ليكى يا سيدتى . . . وجه مولاتى نفرتيتى .
نفرتيتى : حلو قوى يا إخنا تون ! إمتى عملته ؟
(تنظر ثانية إلى التمثال وتخطو ناحية إخنا تون وتمسك يده فى
حب)

لا يا إخنا تون أنا مش حلوة قوى كده !
بيك : (وقفة ، إلى إخنا تون) فيه حاجة لا بد أبلغها لمولاي . . .
(يتوقف)

إخنا تون : خير .
بيك : صورك يا مولاي شو هوها فى كل مكان حطيناها فيه !
نفرتيتى : (فى غضب لتوتو) إزاي ؟ ومين يجرو يعمل كده ؟ !

(وقفة)

توتو : (ينحنى فى هدوء) مظنش يا مولاتى إن ده مقصود .

إخناثون : الكهنة وأتباعهم وراء كل الكلام ده .
توتو : سنحقق فى ذلك يا مولاي لكن المدينة كلها آمنة كما سترى يا
مولاي ، والناس الآن منتظرة عشان تشوف ملكها
المحسوب . . .

(وقفه)

إذن نتوكل على الله .

إظلام

المشهد السابع

(الساحة أمام المعبد، الجمهور ينتظر ظهور إخناتون،
وتسمع أصوات الموسيقى والطبول . . . يتتشر
الكهنة وأتباعهم بين الجمهور يترقبون فى قلق شديد
مجيء إخناتون).

(أعلى المسرح يدخل رجلان ويتوجهان إلى
الجمهور).

- | | |
|---|---------|
| : ده غضب الآلهة . | الرجل ١ |
| : عشان المعابد اللى هدمناها . | الرجل ٢ |
| : عمرنا ما شقنا فيضان زى ده ، المطر والرعد والبرق | الرجل ١ |
| موقوفوش طول ليلة إمبراح ! | |

- الرجل ٢ : فعلا ده غضب الآلهة . . . دى نهاية العالم !
- الرجل ١ : (ناظر احواليه) هس !
- الرجل ٢ : (فى استهتار وتحريض) معادش فيه سكوت ، هيعملوا فينا أكثر من كده إيه؟ الناس نفسيتها فى الأرض ، أكيد دى لعنة الآلهة ، (فى تهكم) سمعت إنه هيعلن الدين الجديد دلوقتى !
- (فى صوت عال حتى يسمعه الآخرون) مفيش فرعون حقيقى يسب دين أبوه !
- (الجمهور حول الرجلين يهمهم)
- (فى سخرية) الإله الجديد مبشفوش ، عشان مالش شكل ولا صورة ! بس الحقيقة بيحبنا ، ومبيغضبش أبدا ولا بيغير من الآلهة الثانية ، والدليل إن الكاهن الأعظم اتقتل بأوامر من إخناتون ، علشان إله الحب والسلام بتاعه ينسط .
- (تزايد همهمة الجمهور فى فزع وعصبية)

(وقفة)

- الرجل ٣ : (إلى جاره) إنت سمعت ؟ !
- الرجل ٤ : هس الجواسيس فى كل مكان !
- (يدخل إخناتون ، ونفرتيتى ، وتوتو وميرورا ، يتبعهم حارس يحمل التاج ، والحراس الثلاثة ترتفع

الصباحات بينما يتحرك الثلاثة حراس فى حرص

ليحيطوا بإخناتون فى دائرة)

: (هامسا) أمال فىن فرعون

الرجل ٤

: اللى بين الحراس .

الرجل ٣

: (فى دهشة) هو لابس كده ليه؟ لا . لا . إنت متأكد

الرجل ٤

إن ده فرعون؟!

: هس.....

الرجل ٣

: (ناظرا إلى بعض الوجوه فى الصف الأول، يلتفت

إخناتون

إلى نفرىتى) الوجوه دى غريبة مبجهاش، وشفتها

قبل كده!

: فىن؟

نفرىتى

: فى الحلم!

إخناتون

: (إلى إخناتون) هل نبدأ يا مولاي؟

توتو

(إخناتون يومئ إلى ميرورا)

: (يخطو إلى الأمام ويلتفت ليواجه الجمهور، فى

ميرورا

صوت عال للناس) نحتفل اليوم بتتويج ملكنا

المحبوب، إنّه حقاً ليوم عظيم فى تاريخ مصر، يوم

تستحقه مصر والمصريون لأنهم أعطوا العالم المعرفة

والحكمة، إنهم الذين أقاموا الحضارة التى تقود

العالم اليوم. اليوم يعلن ملكنا المحبوب إخناتون

بنفسه القوانين والأوامر التى تكرم ووافق عليها،

هذه القواعد والأوامر تعتبر بحق خطوة هامة فى

حضارة الإنسان ، خطوة ستضع نهاية للظلم وتحقق العدل والسلام والحب ، خطوة ستجعل من كل الناس إخوة ، وليس آلهة وعبيداً ، لكنها أيضاً خطوة ستجعل الناس - كل الناس - عبيداً لإله واحد ، وهو الله سبحانه وتعالى .

(وقفة ، تسمع همهمة الناس)

لأجل هذا اختار ملكنا المحبوب أن يكون تتويجه بكم وبينكم أيها الشعب ، وعلى بركة الله الواحد القادر .

(وقفة - يومئ إلى الحارس الذى يحمل التاج) ونبدأ أولاً بالتتويج . (ينحنى إلى إخناتون الذى يخطو إلى منتصف المسرح)

: (يقف صارخاً من بين الجمهور) أنت بتتكلم عن الحب والسلام ، وأنا أخويا عذبوه وضربوه لغاية ما مات فى أيدين رجاله إخناتون !

الرجل ١

: (إلى الرجل) مش ممكن يحصل . لا !

إخناتون

: (فى تصميم) حصل . عساكر ربطوه عرياناً على عمود وقعدوا يضربوه لغاية ما انتهى ، (ناظراً إلى رفاقه الآخرين فى نظرة ذات معنى) حصل وأخويا مش أول واحد يتعذب لغاية ما يموت ، فيه كتير زيه !

الرجل ١

: (يقفون فى صوت واحد) حصل ، أيوه حصل .

آخرون

: (فى هدوء إلى إخناتون) سوف نحقق فى هذا يا مولاي .

توتو

(للآخرين بصوت عال) هاتوا أسماء اللي انضربوا
واتعذبوا للغاية لما ماتوا، اتفضلوا، تعالوا هنا .
(يتحرك الكهنة الثلاثة وأتباعهم فى شكل منظم
ناحية المسرح بينما يضيق الحراس الثلاثة الخناق حول
إخنتون)

ميرورا : (يرى الكهنة وأتباعهم يقتربون من المسرح فيخطو
إلى الأمام ليواجههم) مكانك إنت وهو !
(يقتربون أكثر) أنا قلت مكانك . . . مكانك إنت
وهو . . . (يطعنه من الخلف واحد من الحراس
الثلاثة فيسقط)

إخنتون : (صارخا فى عنف) ميرورا !

(يتحول إلى الحارس لكن الحارسين الآخرين يمسكان
به فى عنف ليجبراه على الخروج معهما)
إخنتون : (مصدوما) فيه إيه؟ بتعمل إيه إنت وهو؟ !

(يدفعه بقسوة الحارسان للخروج) سيونى . . .
شيل إيدك (يحاول بلا جدوى أن يتحرر منهما -
صارخا) سيونى !

نفرتينى : (مصدومة تحاول الوصول إلى إخنتون، لكن

الحراس يمنعونها، فى جنون يائس) سيوه !
(تحاول الوصول إليه فيدفعونها إلى الخلف . تسقط
على ركبتيها وهى ترى إخنتون يؤخذ إلى الخارج،
صارخة) لا . لا . مش ممكن، مش ممكن تعملوا فيه
كده يا جبنا ! مش ممكن !

الكاهن الثانى : (ناظرا إلى جسد ميرورا على الأرض والجمهور الذى يهرب فزعاً ، إلى الكاهن الثالث) الناس مرعوبة بتهرب !

الكاهن الأعظم : (يخلع عباءته التى كان متخفياً فيها مندساً بين الناس) محدش يهرب ، ماتخافوش ، ماتخافوش !
(ما زال الجمهور يهرب فزعاً) ليه . . . ليه ؟ !

(إلى الكاهنين والأتباع) قولوا لهم محدش يخاف .
(يتجه إلى منتصف المسرح ، ويواجه الجمهور) قولوا لهم فعلنا هذا لنحميكم . فعلنا هذا من أجلكم ، من أجل أن تعيشوا فى أمن وسلام . فعلنا هذا من أجل آلاف السنين من الحضارة والتقدم . فعلنا هذا أجلكم ومن أجل ألهتكم . . . نعم فعلنا هذا من أجلكم ومن أجل ألهتكم !

إسلام

المشهد الثامن

(كهف فى الجبل، يسود الظلام المسرح، غير أنه
يمكن رؤية إخناتون مقيدا بالحبال إلى صخرة أسفل
يمين المسرح . . . أعلى يمين المسرح يرقد الشاب فاقدًا
الوعى فى حالة بائسة يرثى لها . . .
أسفل يسار المسرح الكاهن الأعظم مفكرا، بينما
يقف حوله الكهنة الثلاثة فى توتر بالغ ينظرون إلى
إخناتون الذى يبدو مرهقا مصدوما . . . تأتي من
على البعد موسيقى الحلم ومعها أصداء صرخات
ونحيب نفرتيتى . . .)

الكاهن الأعظم : (يلتفت متطلعا إلى حيث تأتي الصرخات والنحيب)
ما هذا؟

الكاهن الأول : نفرتيتى تجوب الشوارع تبحث عنه .

(وقفة)

الكاهن الثالث : (ينظر أعلى المسرح فشاهد ألسنة النار والدخان)
المدينة تحترق! الوقت ليس فى صالحنا يا مولانا .

(وقفة)

الكاهن الأعظم : (يتجه ناحية إخناتون، ويقف أمامه، ينحنى فى
لهجة مسرحية) أقدم اعتذارى لمولاى لأننى لم أتمكن
من حضور حفل تتويجكم، كنت أود الحضور لكنكم
لم تدعونى، كان حفلا عظيما، يا خسارة لم أره!
إخناتون : (ينهض فى بطاء ليقف على قدميه، فى تصميم
وإرادة قوية) مش هتفلت من العقاب على اللى
عملته ده .

الكاهن الأعظم : (كأنه لم يسمعه) كان حفلا عظيما، لكن بأمانة لم
يعجبنى؛ لأنه لم يكن حقيقى وشرعى، وأنا أحب
الحققة ، الشدة ، كنانة دته يحك فى معاندنا مع

يا مولاي ! لماذا؟ لماذا؟

إخناثون : (صارخاً) إنت أعمى، مفيش آلهة، خالق الكون
واحد هو الله! . . .

الكاهن الأعظم : (مقاطعاً فى حدة) ما زلت تحلم! (يتوقف، يذرع
المكان جيئة وذهاباً، ثم يتوقف، ملتفتاً إليه) هناك
آلهة وستظل هذه الآلهة موجودة دائماً وأبداً.
أمون، رع سيت، سوتبخ، بال، إشتار، جدودك
وجدود جدودك الفراعنة العظام كانوا آلهة،
وسيكون هناك دائماً فراعنة. (متجهاً إليه) هل تعرف
لماذا؟ لأن الناس يحتاجون فراعنة، هذا هو العقد
والاتفاق منذ بداية الحياة، ولن يستطيع أحد تغيير
ذلك ! الآلهة هم الشرعية والقوة التى تقدم الأمن
والحماية لكل المواطنين .

إخناثون : مواطنين؟ تقصد العبيد، إنتم بتخلقوا آلهة عشان
تستعبدوا الناس، وعلشان تبرروا الظلم والفساد،
الناس خلقها ربنا حرة ياريتنا، الناس . . .

الكاهن الأعظم : الناس؟! أين هؤلاء الناس الذين تتحدث عنهم؟
ماذا فعلوا من أجلك لقد هربوا من مدينتك وتركوك
وحيداً، لقد هربوا جميعاً . . . (ناظراً إلى الشاب،
فى سخريه) ما عدا هذا الشاب الأحمق !

(وقفه)

إخناثون

: وأين إلهك الواحد، أين هو؟ لماذا تركك وحيدا؟

لا. ربى لم يتركنى، أنا رسوله ومش هيتخلى
عنى... (بنتفض جسمه وهو يصرخ كلماته كأنها
رفيقه الذى لم يتركه بعد) لم يتركنى ربى أبدا، لا،
أنا مش لوحدى، أيوه... أنا مش لوحدى!...
هو معايا!

(تسمع الآن وبوضوح تراتيل وتسابيح الحلم الذى
يعيشه إخناثون فى استغراق كامل)

الكاهن الأعظم

: (فى هدوء) نحن الآن فى مفترق طرق، أمامك
طريقين: طريقك، ولقد وصلنا كما ترى إلى نهايته،
وطريقنا... وطريقنا ما زال أمامك مفتوحا،
لا زلت تستطيع أن تكون فرعون مصر العظيم،
سنذهب إلى طيبة ونتوجك فى معابدها وسنقول
للناس إن اللى ظهر فى هذه المدينة لم يكن أنت...
لم يكن الفرعون الحقيقى...

(وقفة)

ماذا تقول؟

إخناثون

: لا مش محتاج أكاذيبك!
الكاهن الأعظم : بمناسبة الأكاذيب، كانت هناك ملكة عظيمة، لكنها

للأسف عاقر ، وتمنت أن يكون لها ولد للعرش
ساعدناها وصنعنا معها كذبة !

إخناتون : إنت بتكلم عن إيه ؟

الكاهن الأعظم : عن الأكاذيب ، عنك !

إخناتون : أنا إخناتون ، أمير . . .

الكاهن الأعظم : نعم أنت إخناتون وأمير (يقترّب منه ناظرًا في عينيه
فى تحد) ولكنك لست ابن الفرعون العظيم
أمنحوتب .

إخناتون : (يحاول التمسك لكن روحه تنهار) كذاب فاسد !

الكاهن الأعظم : (مقاطعًا) لا . لست كاذبًا ، الملكة تاي تعرف

الحقيقة . (يرى تأثير كلماته على وجه إخناتون)

لست كاذبًا ، أعط نفسك الوقت وانظر فى ما أعرضه

عليك ، أنا أعرض عليك الكثير ، وأنت لا تملك

شيئًا . . . نعم لا تملك شيئًا . . . يا مولاي ! لقد

انتهى الحلم . . . إصح يا مولاي ! (يعود إلى حيث

ينظر الكهنة الثلاثة فى توتر)

الكاهن الثالث : (هامسًا إلى الكاهن الأعظم فى نفاذ صبر) ليس لدينا

خيار يا سيدى ، سوف تموت جميعًا ونفقد كل شىء

إذا تركناه يعيش !

الكاهن الثانى : نعم سيدى الكاهن الأعظم ليس لدينا خيار !

(وقفه)

الكاهن الأعظم : (ناظرا إلى إخناتون فى ابتسامه وثقة) إنه يحتاج إلى بعض الوقت ، لكنه فى النهاية سيقبل ما نعرضه عليه .
(خارجا يتبعه الكهنة الثلاثة) فى الصباح يكون كل شئ على ما يرام .

(صمت)

إخناتون : (تصدر عن الشاب أنات ألم)
(مصدوما تتصارع فى عقله الذكريات ، لنفسه) أمى الملكة عارفة . . أمى الملكة . . لا . . هى مش أمى . . ولا هو أبويا ! (وقفه) أمال أنا أبقى مين ؟ مين أنا . . حلم ؟! أبوه حلم . . حلم انتهى ما عادش فيه غير الهوان والذل ! لا . لا . لا ! ربي . . يارب . . إنت فين ؟

(وقفه)

أنا وحدى مغلوب على أمرى ومعادش فيه غير الهوان ! أنا وحدى يارب ؟! مفيش معايا حد ! إنت فين يارب ؟! موجود . . أبوه . . أبوه . . إنت

موجود . . . موجود يا رب خد يايدى . . . خد
يايدى وساعدنى يا رب! . . . يمكن صحيح أنا مش
ابنهم، بس أنا حلمى حقيقى وإنت عارف يا رب،
لأن إنت الحق (صارخا) يا رب!
(يعلو أنين الشاب بعد أن استعاد وعيه!)
(إلى الشاب ملتفتا إليه) أنا آسف!
(يقف الشاب مفزوعا ويخرج من بين طيات ملابسه
خنجرا)

آسف على اللى عملوه فيك . . . آسف . . .
ما كنتش أقصد . ما كنتش أعرف إن الحلم هينتهى
كده . . . أنا ما كنتش عاوز أبنى هرم لنفسى . أنا كنت
عاوز أخللى كل مصرى يبقى هو نفسه هرم . . . كنت
عاوز أحرر المصريين من أنفسهم، كنت عاوزهم
يؤمنوا بالله الواحد، لأن عمرهم ما هيفخافوا من
بعض ولا يستعبدوا بعض لو آمنوا وخافوا رب واحد
قادر بس للأسف ما يعرفوش مع إنها بسيطة مش
محتاجه نبى عشان يفهمها! . . . (وقفة) (ناظرا إلى
الشاب فى رثاء حزين) أنا آسف . . . سامحنى .
(يخطو الشاب إلى إختاتون، يركع مقبلا يديه باكيا)
ماتعيطش ولادى جاين، أنا شابفهم جاين! . . .
جاين!
(يحول وجهه إلى ناحية التساييح التى تأتى من على
البعد)

جايين . . . المؤمنين جايين . . . حلمنا هيسبقى
حقيقة . . . جايين ما تعيطش (محاولا أن يتحكم فى
دموعه هو الآخر) إحنا مش لوحدنا . . .
(مستخدما الإشارات ، يقول الشاب : إنه مستعد
للدفاع عن إختاتون والذود عنه مستخدما خنجره)
إنت عاوز تدافع عنى ؟

(يومئ الشاب بنعم) (صمت)
(كمن قرر شيئاً ، محاولا أن يستجمع شجاعته)
أيوه . . . ممكن تدافع عنى ، الخنجر الللى فى إيدك ده
ممكن يحمى حلمنا من الهوان . . . أيوه . . .
(يرتعد الشاب من الفكرة ، فيجربى إلى الزاوية دافنا
رأسه بين يديه ، ييكى ويهز رأسه رافضاً) (صمت)
إنت مؤمن ؟

(يومئ الشاب بنعم)
المؤمن مايخافش الموت ، المؤمن ما يخافش حاجة
ولا يرضى الهوان لنفسه أو لدينه . . . إنت سامعنى ؟
(فى عصبية بالغة يهز رأسه رافضاً)
اسمعنى . . . ده مش هروب ، إحنا مش جنبنا ، إحنا
مؤمنين ، وده طريقنا عشان نحمى حلمنا من الهوان ،
عشان يظل حلمنا عايش للأبد . . .

(وقفة)

ماتخافش . . . تعال . . . إنت وأنا شفنا كتير عشان
حللنا، لكن ماعدش إلا الهوان . . . تعال!

(وقفة)

حلم المؤمنين شجاع وحر، إنت وأنا نحميه من
الهوان! تعال . تعال . . . ماتخافش . .
تعال . . .

حللنا هيظل شجاع وحر . . . أيوه شجاع وحر!
تعال . . . تعال .

فى بطء يتحرك الشاب وفى يده الخنجر ناحية
إختاتون . . .)

إظلام
نهاية المسرحية

رقم الإيداع ٢٠٠٦/٢٤٠٧

الترقيم الدولي I.S.B.N. - 977-09-1526-2